



65746

通志卷第六上

宋 右 迪 功

後漢紀第六上

光武 明帝 章帝 和帝 殤帝 安帝



漁 仲 撰

世祖光武皇帝諱秀字文叔南陽蔡陽人高祖九世之孫也出自景帝生長沙定王發發生春陵節侯買買生鬱林太守外外生鉅鹿都尉回回生南頓令欽欽生光武光武年九歲而孤養於叔父良身長七尺三寸美須眉大口隆準日角性勤於稼穡而兄伯升好俠養士常非笑光武事田業比之高祖兄仲王莽天鳳中乃之長通志 卷六上 後漢紀六上 一

安受尚書略通大義莽末天下連歲災蝗寇盜鋒起地皇三年南陽荒饑諸家賓客多為小盜光武避吏新野因賣穀於宛宛人李通等以圖讖說光武云劉氏復起李氏為輔光武初不敢當然獨念兄伯升素結輕客必舉大事且王莽敗亡已兆天下方亂遂與定謀於是乃市兵弩十月與李通從弟軼等起於宛時年二十八十一月有星孛於張光武遂將賓客還春陵時伯升已會眾起兵初諸家子弟恐懼皆亡逃自匿曰伯升殺我及見光武絳衣大冠皆驚曰謹厚者亦復為之乃稍自安伯升於是招新市平林兵與其帥王鳳陳收西擊長聚

光武初騎牛殺新野尉乃得馬進屠唐子鄉又殺湖陽尉軍中分財物不均衆恚恨欲反攻諸劉光武斂宗人所得物悉以與之衆乃悅進拔棘陽與王莽前隊大夫甄阜屬正梁邱賜戰於小長安漢軍大敗還保棘陽

更始元年正月甲子朔漢軍復與甄阜梁邱賜戰於泚

水西大破之斬阜賜伯升又破王莽納言將軍嚴尤秩

宗將軍陳茂於清陽進圍宛城二月辛巳立劉聖公爲

天子以伯升爲大司徒光武爲太常偏將軍三月光武

別與諸將徇昆陽定陵鄧皆下之多得牛馬財物穀四

十萬斛轉以饋宛下莽聞阜賜死漢帝立大懼遣大司

徒王尋大司空王邑將兵百萬其甲士四十二萬人五

月到潁川復與嚴尤陳茂合初光武爲舂陵侯家訟逋

租於尤尤見而奇之及是時城中出降尤者言光武不

取財物但會兵計策尤笑曰是美須眉者邪何爲乃如

是初王莽徵天下能爲兵法者六十三家數百人竝以

爲軍吏選練武衛招募猛士旌旗輜重千里不絕有長

人巨無霸長一丈大十圍以爲壘尉又驅諸猛獸虎豹

犀象之屬以助威武自秦漢出師之盛未嘗有也光武

將數千兵徼之於陽關諸將見尋邑兵盛反走馳入昆

陽皆惶怖憂念妻帑欲散歸諸城光武議曰今兵穀旣

通志

卷六上

後漢紀六上

二

少而外寇疆大并力禦之功庶可立如欲分散勢無俱
全且宛城未拔不能相救昆陽卽破一日之間諸部亦
滅矣今不同心膽共舉功名反欲守妻子財物邪諸將
怒曰劉將軍何敢如是光武笑而起會候騎還言大兵
且至城北軍陳數百里不見其後諸將遽相謂曰更請
劉將軍計之光武復爲圖畫成敗諸將憂迫皆曰諾時
城中唯有八九千人光武乃使成國上公王鳳廷尉大
將軍王常留守夜自與驃騎大將軍宗佻五威將軍李
軼等十三騎出城南門於外收兵時莽軍到城下者且
十萬光武幾不得出旣至郾定陵悉發諸營兵而諸將

通志

卷六上

後漢紀六上

三

貪惜財貨欲分留守之光武曰今若破敵珍珠萬倍大
功可成如爲所敗首領無餘何財物之有衆乃從嚴尤
說王邑曰昆陽城小而堅今假號者在宛亟進大兵彼
必奔走宛敗昆陽自服邑曰吾昔以虎牙將軍圍翟義
坐不生得以見責讓今將百萬之衆遇城而不能下何
謂邪遂圍之數十重列營百數雲車十餘丈瞰臨城中
旗幟蔽野埃塵連天鉦鼓之聲聞數百里或爲地道衝
輻撞城積弩亂發矢下如雨城中負戶而汲王鳳等乞
降不許尋邑自以爲功在漏刻意氣甚逸夜有流星墜
營中晝有雲如壞山當營而隕不及地尺而散吏士皆

獸伏六月巳卯光武遂與營部俱進自將部騎千餘前
去大軍四五里而陳尋邑亦遣兵數千合戰光武奔之
斬首數十級諸部喜曰劉將軍平生見小敵怯今見大
敵勇甚可怪也且復居前請助將軍光武復進尋邑兵
却諸將共乘之斬首數百千級連勝遂前時伯升拔宛
已三日而光武尙未知乃僞使持書報城中云宛下兵
到而陽墮其書尋邑得之不喜諸將既經累捷膽氣益
壯無不一當百光武乃與敢死者三千人從城西水上
衝其中堅尋邑陳亂乘銳崩之遂殺王尋城中亦鼓譟
而出中外合勢震呼動天地莽兵大潰走者相騰踐奔
殪百餘里間會大雷風屋瓦皆飛雨下如注潢川盛溢
虎豹皆股戰士卒爭赴溺死者以萬數水爲不流王邑
嚴尤陳茂輕騎乘死人度水逃去盡獲其軍實輜重車
甲珍寶不可勝算舉之連月不盡或燔燒其餘光武因
復徇下潁陽會伯升爲更始所害光武自父城馳詣宛
謝司徒官屬弔迎光武光武難交私語深引過而已未
嘗自伐昆陽之功又不敢爲伯升服喪飲食言笑如平
常更始以是慙拜光武爲破虜大將軍封武信侯九月
庚戌三輔豪傑共誅王莽傳首詣宛更始將北都洛陽
以光武行司隸校尉使前整修官府於是置僚屬作文

移從事師察一如舊章時三輔吏士東迎更始見諸將
過皆冠幘而服婦人衣諸子繡驅莫不笑之或有畏而
走者及見司隸僚屬皆歡喜不自勝老吏或垂泣曰不
圖今日復見漢官威儀由是識者皆屬心焉及更始至
洛陽乃遣光武以破虜將軍行大司馬十月持節北度
河鎮慰州郡所到郡縣輒見二千石長吏三老官屬下
至佐史考察黜陟如州牧故事輒平遣囚徒除王莽苛
政復漢官名吏人喜悅爭持牛酒迎勞進至邯鄲故趙
繆王子林說光武曰赤眉今在河東但決水灌之百萬
之衆可使爲魚光武不答去之眞定林於是乃詐以卜
者王郎爲武帝子子輿十二月立郎爲天子都邯鄲遂
遣使者降下郡國

通志

卷六上

後漢紀六上

五

二年正月光武以王郎新盛乃北徇薊王郎移檄購光
武十萬戶而故廣陽王子劉接起兵薊中以應郎城內
擾亂轉相驚恐言邯鄲使者方到二千石以下皆出迎
於是光武趣駕南轅晨夜不敢入城邑舍食道傍至饒
陽官屬皆乏食光武乃自稱邯鄲使者入傳舍傳吏方
進食從者饑爭奪之傳吏疑其僞乃椎鼓數十通給言
邯鄲將軍至官屬皆失色光武升車欲馳旣而懼不免
徐還坐曰請邯鄲將軍入久乃駕去傳中人遙語門者

閉之門長曰天下詎可知而閉長者乎遂得南出晨夜兼行蒙犯霜雪天時寒面皆破裂以庠沱河無船適遇水合得過未畢數騎而陷進至下博城西遑惑不知所之有白衣老父在道傍指曰努力信都郡爲長安守去此八十里光武卽馳赴之信都太守任光開門出迎世祖因發旁縣得四千人先擊堂陽貫縣皆降之王莽和戎卒正邳彤亦舉郡降又昌城人劉植宋子人耿純各率宗親子弟據其縣邑以奉光武於是北降下曲陽衆稍合樂附者至有數萬人復北擊中山拔盧奴所過發

奔命兵移檄邊郡共擊邯鄲郡縣還復響應南擊新市

通志

卷六上

後漢紀六上

六

眞定元氏防子皆下之因入趙界時王郎大將李育屯柏人漢兵不知而進前部偏將朱浮鄧禹爲育所破亡失輜重光武在後聞之收浮禹散卒與育戰於郭門大破之盡得其所獲育還保城攻之不下於是引兵拔廣阿會上谷太守耿況漁陽太守彭寵各遣其將吳漢寇恂等將突騎來助擊王郎更始亦遣尙書僕射謝躬討郎光武因大享士卒遂東圍鉅鹿王郎守將王饒堅守月餘不下郎遣將倪宏劉奉率數萬人救鉅鹿光武逆戰於南巖斬首數千級四月進圍邯鄲連戰破之五月甲辰拔其城誅王郎收文書得吏人與郎交關謗毀者

數千章光武不省會諸將軍燒之曰令反側子自安更始遣侍御史持節立光武爲蕭王令悉罷兵詣行在所光武辭以河北未平不就徵自是始貳於更始是時長安政亂四方背叛梁王劉永檀命睢陽公孫述稱王巴蜀李憲自立爲淮南王秦豐自號楚黎王張步起琅邪董憲起東海延岑起漢中田戎起夷陵竝置將帥侵略郡縣又別號諸賊銅馬大彤高湖重連鐵脰大搶尤來上江青犢五校檀鄉五幡五樓富平獲索等各領部曲衆合數百萬人所在寇掠光武將擊之先遣吳漢北發十郡兵幽州牧苗曾不從漢遂斬曾而發其衆秋光武擊銅馬於鄴吳漢將突騎來會清陽賊數挑戰光武堅營自守有出鹵掠者輒擊取之絕其糧道積月餘日賊食盡夜遯去追至館陶大破之受降未盡而高湖重連從東南來與銅馬餘衆合光武復與大戰於蒲陽悉破降之封其渠帥爲列侯降者尤不自安光武知其意敕令各歸營勒兵乃自乘輕騎案行部陳降者更相語曰蕭王推赤心置人腹中安得不投死乎由是皆服悉將降人分配諸將衆遂數十萬故關西號光武爲銅馬帝赤眉別帥與大彤青犢十餘萬衆在射犬光武進擊大破之衆皆散走使吳漢岑彭襲殺謝躬於鄴青犢赤眉

賊入函谷關攻更始光武乃遣鄧禹率六裨將引兵而西以乘更始赤眉之亂時更始使大司馬朱鮪舞陰王李軼等屯洛陽光武亦令馮異守孟津以拒之

建武元年春正月平陵人方望立前孺子劉嬰爲天子更始遣丞相李松擊斬之光武北擊尤來大搶五幡於元氏追至右北平連破之又戰於順水北乘勝輕進反爲所敗賊追急短兵接光武自投高岸遇突騎王豐下馬授光武光武撫其肩而上顧笑謂耿弇曰幾爲虜嗤弇頗射却賊得免士卒死者數千人散兵歸保范陽軍中不見光武或云已沒諸將不知所爲吳漢曰卿曹努

通志

卷六上

後漢紀六上

八

力王兄子在南陽何憂無主衆恐懼數日乃定賊雖戰勝而素懼大威客主不相知夜遂引去大軍復進至安次與戰破之斬首三千餘級賊入漁陽乃遣吳漢率耿弇陳俊馬武等十二將軍追戰於潞東及平谷大破滅之朱鮪遣討難將軍蒲茂攻溫馮異寇恂與戰大破之斬其將賈彊於是諸將議上尊號馬武先進曰天下無主如有聖人承敝而起雖仲尼爲相孫子爲將猶恐無能有益反水不收後悔無及大王雖執謙退柰宗廟社稷何宜且還薊卽尊位乃議征伐今此誰賊而馳騫擊之乎光武驚曰何將軍出是言可斬也武曰諸將盡然

光武使出曉之乃引軍還至薊夏四月公孫述自稱天子光武從薊還過范陽命收葬吏士至中山諸將復上奏曰漢遭王莽宗廟廢絕豪傑憤怒兆人塗炭王與伯升首舉義兵更始因其資以據帝位而不能奉承大統敗亂綱紀盜賊日多羣生危蹙大王初征昆陽王莽自潰後拔邯鄲北州殭定三分天下而有其二跨州據土帶甲百萬言武力則莫之敢抗論文德則無所與辭臣聞帝王不可以久曠天命不可以謙拒惟大王以社稷爲計萬姓爲心光武又不聽行到南平棘諸將復固請之光武曰寇賊未平四面受敵何遽欲正號位乎諸將且出耿純進曰天下士大夫捐親戚棄土壤從大王於矢石之間者其計固望其攀龍鱗附鳳翼以成其所志耳今功業卽定天人亦應而大王畱時逆衆不正號位純恐士大夫望絕計窮則有去歸之思無爲久自苦也大衆一散難可復合時不可畱衆不可逆純言甚誠切光武深感曰吾將思之行至鄗光武先在長安時同舍生彊華自關中奉赤伏符曰劉秀發兵捕不道四夷雲集龍鬪野四七之際火爲主羣臣因復奏曰受命之符人應爲大萬里合信不議同情周之白魚曷足比焉今上無天子海內淆亂符瑞之應昭然著聞宜答天神以

塞羣望光武於是命有司設壇場於鄗南千秋亭五成陌六月己未卽皇帝位燔燎告天禋於六宗望於羣神其祝文曰皇天上帝后土神祇眷顧降命屬秀黎元爲人父母秀不敢當羣下百辟不謀同辭咸曰王莽篡位秀發憤興兵破王尋王邑於昆陽誅王郎銅馬於河北平定天下海內蒙恩上當天地之心下爲元元所歸識記曰劉秀發兵捕不道卯金修德爲天子秀猶固辭至於再至於三羣下僉曰皇天大命不可稽留敢不敬承於是建元爲建武大赦天下改鄗爲高邑是月赤眉立

劉盆子爲天子甲子前將軍鄧禹擊更始定國公王匡

通志

卷六上

後漢紀六上

十

於安邑大破之斬其將劉均秋七月辛未拜前將軍鄧禹爲大司徒丁丑以野王令王梁爲大司空壬午以大將軍吳漢爲大司馬偏將軍景丹爲驃騎大將軍大將軍耿弇爲建威大將軍偏將軍蓋延爲虎牙大將軍偏將軍朱祐爲建義大將軍中堅將軍杜茂爲大將軍時宗室劉茂自號馱新將軍率衆降封爲中山王己亥幸懷遣耿弇率彊弩將軍陳俊軍五社津備滎陽以東使吳漢率朱祐及廷尉岑彭執金吾賈復揚化將軍堅鐔等十一將軍圍朱鮪於洛陽八月壬子祭社稷癸丑祠高祖太宗世宗於懷宮進幸河陽更始廩邱王田立降

九月赤眉入長安更始奔高陵辛未詔曰更始破敗棄城逃走妻子裸袒流冗道路朕甚愍之今封更始爲淮陽王吏人敢有賊害者罪同大逆甲申以前高密令卓茂爲太傅辛卯朱鮪舉城降冬十月癸丑車駕入洛陽幸南官却非殿遂定都焉遣岑彭擊荊州羣賊十一月甲午幸懷劉永自稱天子十二月丙戌至自懷赤眉殺更始而隗囂據隴右盧芳起安定破虜大將軍叔壽擊五校賊於曲梁戰歿

二年春正月甲子朔日有食之大司馬吳漢率九將軍擊檀鄉賊於鄴東大破降之庚辰封功臣皆爲列侯大

通志

卷六上

後漢紀六上

七

國四縣餘各有差詔以顯效未酬名籍未立者大鴻臚趣上朕將差而錄之博士丁恭議曰古帝王封諸侯不過百里今封侯諸四縣不合法制帝曰古之亡國皆以亡道未嘗聞功臣地多而滅亡者乃遣謁者卽授印綬壬午更始復漢將軍鄧曄輔漢將軍于匡降皆復爵位壬子起高廟建社稷於洛陽立郊兆於城南始正火德色尚赤是月赤眉焚西京宮室發掘園陵寇掠關中大司徒鄧禹入長安遣府掾奉十一帝神主納於高廟眞定王楊臨邑侯讓謀反遣前將軍耿純誅之二月己酉幸修武大司空王梁免壬子以太中大夫宋弘爲大司

空遣驃騎大將軍景丹率征虜將軍祭遵等二將軍擊
弘農賊破之因遣祭遵圍蠻中賊張滿漁陽太守彭寵
反攻幽州牧朱浮於薊延岑自稱武安王於漢中辛卯
至自修武三月乙未大赦天下詔頃獄多寃人用刑深
刻朕甚愍之其與中二千石諸大夫博士議郎議省刑
法遣執金吾賈復率二將軍擊更始郾王尹遵破降之
驍騎將軍劉植擊密賊戰歿遣虎牙大將軍蓋延率四
將軍伐劉永夏四月圍永於睢陽更始將蘇茂殺淮陽
太守潘蹇而附劉永甲午封叔父良爲廣陽王兄子章
爲太原王章弟興爲魯王春陵侯嫡子祉爲城陽王五

通志

卷六上

後漢紀六上

三

月庚辰封更始元氏王歛爲泗水王故眞定王楊子德
爲眞定王周後姬常爲周承休公癸未詔曰民有嫁妻
賣子欲歸父母者恣聽之敢拘執論如律六月戊戌立
貴人郭氏爲皇后子彊爲皇太子大赦天下增郎謁者
從官秩各一等丙午封宗子劉終爲淄川王秋八月帝
自將征五校丙辰幸內黃大破五校於蕭陽降之遣游
擊將軍鄧隆救朱浮與彭寵戰於潞隆軍敗績蓋延拔
睢陽劉永奔譙破虜將軍鄧奉據淸陽反九月壬戌至
自內黃驃騎大將軍景丹薨延岑大破赤眉於杜陵關
中飢民相食冬十一月以廷尉岑彭爲征南大將軍率

八將軍討鄧奉於堵鄉銅馬青犢尤來餘賊共立孫登
爲天子於上郡登將樂元殺登以其衆五萬餘人降遣
偏將軍馮異代鄧禹伐赤眉使太中大夫伏隆持節安
輯青徐二州招張步降之十二月戊午詔曰惟宗室列
侯爲王莽所廢先靈無所依歸朕甚愍之其竝復故國
若侯身已歿屬所上其子孫見名尙書封拜是歲蓋延
等大破劉永於沛西初王莽末天下旱蝗黃金一斤易
粟一斛至是野穀旅生麻菽尤盛野蠶成繭被於山阜
人收其利焉

三年春正月甲子以偏將軍馮異爲征西大將軍杜茂

通志

卷六上

後漢紀六上

三

爲驃騎大將軍大司徒鄧禹及馮異與赤眉戰於回溪
禹異敗績征虜將軍祭遵破蠻中斬張滿辛已立皇考
南頓君已上四廟壬午大赦天下閏月乙巳大司徒鄧
禹免馮異與赤眉戰於崑底大破之餘衆南向宜陽帝
自將征之己亥幸宜陽甲辰親勒六軍大陳戎馬大司
馬吳漢精卒當前中軍次之驍騎武衛分陳左右赤眉
望見震怖遣使乞降丙午赤眉君臣面縛奉高皇帝璽
綬詔以屬城門校尉戊申至自宜陽己酉詔曰羣盜縱
橫賊害元元盆子竊尊號亂惑天下朕奮兵討擊應時
崩解十餘萬衆束手降服先帝璽綬歸之王府斯皆祖

宗之靈士人之力朕曷足以享斯哉其擇吉日祠高廟
賜天下長子當爲父後者爵人一級二月己未祠高廟
受傳國璽劉永立董憲爲海西王張步爲齊王步殺光
祿大夫伏隆反帝幸懷遣吳漢率二將軍擊青犢於軹
西大破降之三月壬寅以大司徒司直伏湛爲大司徒
彭寵陷薊城寵自立爲燕王帝自將征鄧奉幸堵陽夏
四月大破鄧奉於小長安斬之馮異與延岑戰於上林
破之吳漢率七將軍與劉永將蘇茂戰於廣樂大破之
虎牙大將軍蓋延圍劉永於睢陽五月己酉車駕還宮
乙卯晦日有蝕之六月壬戌大赦天下耿弇與延岑戰

通志

卷六上

後漢紀六上

四

于穰大破之秋七月征南大將軍岑彭率三將軍伐秦
豐戰於黎邱大破之獲其將蔡宏庚辰詔曰吏不滿六
百石下至墨綬長相有罪先請男子八十以上十歲以
下及婦人從坐者自非不道詔所名捕皆不得繫當驗
問者卽就驗女徒雇山歸家蓋延拔睢陽獲劉永而蘇
茂周建立永子紆爲梁王冬十月壬申幸春陵祠園廟
因置酒舊宅大會故人父老十一月乙未至自春陵涿
郡太守張豐反是歲李憲自稱天子西州大將軍隗囂
奉奏建義大將軍朱祐率祭遵與延岑戰於東陽斬其

將張成

四年春正月甲申大赦天下二月壬子幸懷壬申至自懷遣右將軍鄧禹率二將軍與延岑戰於武當破之夏四月丁巳幸鄴己巳進幸臨平遣大司馬吳漢擊五校賊於箕山大破之五月進幸元氏辛巳進幸盧奴遣征虜將軍祭遵率四將軍討張豐於涿郡斬豐六月辛亥車駕還宮七月丁亥幸譙遣捕虜將軍馬武偏將軍王霸圍劉紆於垂惠董憲將賁休以蘭陵城降憲圍之虎牙大將軍蓋延率平狄將軍龐萌救賁休不克蘭陵爲憲所陷秋八月戊午進幸壽春太中大夫徐憚擅殺臨淮太守劉度憚坐誅遣楊武將軍馬成率三將軍伐李通志

卷六上

後漢紀六上

五

憲九月圍憲於舒冬十月甲寅車駕還宮太傅卓茂薨十一月丙申幸宛遣建義大將軍朱祐率二將軍圍秦豐於黎邱十二月丙寅進幸黎邱是歲征西大將軍馮異與公孫述將程焉戰於陳倉破之

五年春正月癸巳車駕還宮二月丙午大赦天下捕虜將軍馬武偏將軍王霸拔垂惠乙丑幸魏郡壬申封殷後孔安爲殷紹嘉公彭寵爲其蒼頭所殺漁陽平大司馬吳漢率建威大將軍耿弇擊富平獲索賊於平原大破降之復遣耿弇率二將軍討張步三月癸未徙廣陽王良爲趙王始就國平狄將軍龐萌反殺楚郡太守孫

萌而東附董憲遣征南大將軍岑彭率二將軍伐田戎於津鄉大破之夏四月旱蝗河西大將軍竇融始遣使貢獻五月丙子詔曰久旱傷麥秋種未下朕甚憂之將殘吏未勝獄多寃結元元愁恨感動天氣乎其令中都官三輔郡國出繫囚罪非犯殊死一切勿案見徒免爲庶人務進柔良退貪酷各正厥事焉六月建義大將軍朱祐拔黎邱獲秦豐而龐萌蘇茂圍桃城帝時幸蒙因自將征之先理兵任城乃進救桃城大破萌等秋七月丁丑幸沛祠高原廟詔修復西京園陵進幸湖陵征董憲又幸蕃遂攻董憲於昌慮大破之八月巳酉進幸郟畱吳漢攻劉紆董憲等車駕轉徇彭城下邳吳漢拔郟獲劉紆漢進圍董憲龐萌於胸冬十月還幸魯使大司空祠孔子耿弇等與張步戰於臨淄大破之帝幸臨淄進幸劇張步斬蘇茂以降齊地平初起太學車駕還宮幸太學賜博士弟子各有差十一月壬寅大司徒伏湛免尚書令侯霸爲大司徒十二月盧芳自稱天子於九原西州太將軍隗囂遣子恂入侍交阯牧鄧讓率七郡太守遣使奉貢詔復濟陽二年徭役是歲野穀漸少田畝益廣焉

六年春正月丙辰改春陵鄉爲章陵縣世世復徭役比

豐沛無有所與辛酉詔曰往歲水旱蝗蟲爲災穀價騰踊人用困乏朕惟百姓無以自贍惻然愍之其命郡國有穀者給稟高年鰥寡孤獨及篤癯無家屬貧不能自存者如律二千石勉加循撫無令失職揚武將軍馬成等拔舒獲李憲二月大司馬吳漢拔胸獲董憲龐萌山東悉平諸將還京師置酒賞賜三月公孫述遣將任滿寇南郡夏四月丙子幸長安始謁高廟遂有事十一陵遣虎牙大將軍蓋延等七將軍從隴道伐公孫述五月己未至自長安隗囂反蓋延等因與囂戰於隴邸諸將敗績辛丑詔曰惟天水隴西安定北地吏人爲隗囂所

通志

卷六上

後漢紀六上

七

註誤者又三輔遭難赤眉有犯法不道者自殊死以下皆赦除之六月辛卯詔曰夫張官置吏所以爲人也今百姓遭難戶口耗少而縣官吏職所置尙繁其令司隸州牧各實所部省減吏員縣國不足置長吏可并合者上大司徒大司空二府於是條奏并省四百餘縣吏職減損十置其一代郡太守劉興擊盧芳將賈覽於高柳戰歿初樂浪人王調據郡不服秋遣樂浪太守王遵擊之郡吏殺調降遣前將軍李通率二將軍與公孫述將戰於西域破之夏蝗秋九月庚子赦樂浪謀反大逆殊死以下丙寅晦日有食之冬十月丁丑詔曰吾德薄不

明寇賊爲害疆弱相陵元元失所詩云日月告凶不用
其行永念厥咎內疚於心其敕公卿舉賢良公正各一
人百僚竝上封事無有隱諱有司修職務遵法度十一
月丁卯詔王莽時吏人沒入爲奴婢不應舊法者皆免
爲庶人十二月壬辰大司空宋弘免癸巳詔曰頃者師
旅未解用度不足故行什一之稅今軍士屯田糧儲差
積其令郡國收見田租三十稅一如舊制隗囂遣將行
巡寇扶風征西大將軍馮異拒破之是歲初罷郡國都
尉官始遣列侯就國匈奴遣使來獻使中郎將報命

七年春正月丙申詔中都官三輔郡國出繫囚非犯殊

通志

卷六上

後漢紀六上

六

死皆一切勿案其罪見徒免爲庶民耐罪亡命吏以文
除之又詔曰世以厚葬爲德薄終爲鄙至於富者奢僭
貧者單財法令不能禁禮義不能止倉卒乃知其咎其
布告天下令知忠臣孝子慈兄悌弟薄葬送終之義二
月辛巳罷護曹都尉官三月丁酉詔曰今國有衆軍竝
多精勇宜且罷輕車騎士材官樓船士及軍假吏令還
復民伍公孫述立隗囂爲朔寧王癸亥晦日有食之避
正殿寢兵不聽事五日詔曰吾德薄致災譴見日月戰
慄恐懼夫何言哉今方念愆庶消厥咎其令有司各修
職任奉遵法度惠茲元元百僚各上封事無有所諱其

上書者不得言聖夏四月壬午詔曰比陰陽錯謬日月
薄食百姓有過在予一人大赦天下公卿司隸州牧舉
賢良方正各一人遣詣公車朕將覽試焉五月戊戌前
將軍李通爲大司空甲寅詔吏人遭饑亂及爲青徐賊
所略爲奴婢下妻欲去畱者恣聽之敢拘制不還以賣
人法從事是夏連雨水漢忠將軍王常爲橫野大將軍
八月丁亥封前河閒王邵爲河閒王隗囂寇安定征西
大將軍馮異征虜將軍祭遵擊却之冬盧芳所置朔方
太守田颯雲中太守喬扈各舉郡降是歲省長水射聲
二校尉官

通志

卷六上

後漢紀六上

九

八年春正月中郎將來歙襲略陽殺隗囂守將而據其
城夏四月司隸校尉傅元下獄死隗囂攻來歙不能下
閏月帝自征囂河西太守竇融率五郡太守與車駕會
高平隴右潰隗囂奔西城遣大司馬吳漢征南大將軍
岑彭圍之進幸上邽不降命虎牙大將軍蓋延建威大
將軍耿弇攻之潁川盜賊寇沒屬縣河東守守兵亦叛
京師騷動秋大水八月帝自上邽晨夜東馳九月乙卯
車駕還宮庚申帝自征潁川盜賊皆降安邱侯張步叛
歸琅邪太守陳俊討獲之戊寅至自潁川冬十月丙午
幸懷十一月乙丑至自懷公孫述遣兵救隗囂吳漢蓋

延等還軍長安天水隴西復反歸囂十二月高句麗王遣使奉貢是歲大水

九年春正月隗囂病死其將王元周宗復立囂子純爲王徙鴈門吏人於太原三月辛亥初置青巾左校尉官公孫述遣將田戎任滿據荊門夏六月丙戌幸緄氏登轅轅遣大司馬吳漢率四將軍擊盧芳將賈覽於高柳戰不利秋八月遣中郎將來歙監征西大將軍馮異等五將軍討隗純於天水驃騎大將軍杜茂與賈覽戰於繁峙茂軍敗績是歲省關都尉復置護羌校尉官

十年春正月大司馬吳漢率捕虜將軍王霸等五將軍

通志

卷六上

後漢紀六上

字

擊賈覽於高柳匈奴遣騎救覽諸將與戰却之修理長安高廟夏征西大將軍馮異破公孫述將趙匡於天水斬之征西大將軍馮異薨秋八月己亥幸長安祠高廟遂有事十一陵戊戌進幸汧隗囂將高峻降冬十月中郎將來歙等大破隗純於落門其將王元奔蜀純與周宗降隴右平先零羌寇金城隴西來歙率諸將擊羌於五谿大破之庚寅車駕還宮是歲省定襄郡徙其民於西河泗水王歙薨淄川王終薨

十一年春二月己卯詔曰天地之性人爲貴其殺奴婢不得減罪己酉幸南陽還幸章陵祠園陵城陽王祉薨

庚午車駕還宮閏月征南大將軍岑彭率三將軍與公孫述將田戎任滿戰於荆門大破之獲任滿威虜將軍馮駿圍田戎於江州岑彭遂率舟師伐公孫述平巴郡夏四月丁卯省大司徒司直官先零羌寇臨洮六月中郎將來歙率揚武將軍馬成破公孫述將王元環安於下辯安遣閒人刺殺中郎將來歙帝自將攻公孫述秋七月次長安八月岑彭破公孫述將侯丹於黃石輔威將軍臧宮與公孫述將延岑戰於沈水大破之王元降至自長安癸亥詔曰敢炙灼奴婢論如律免所炙灼者爲庶民冬十月壬午詔除奴婢射傷人棄市律公孫述通志

卷六上

後漢紀六上

五

遣閒人刺殺征南大將軍岑彭馬成平武都因隴西太守馬援擊破先零羌徙致天水隴西扶風十二月大司馬吳漢率舟師伐公孫述是歲省朔方牧并并州初斷州牧自還奏事

十二年春正月大司馬吳漢與公孫述將史興戰於武陽斬之三月癸酉詔隴蜀民被略爲奴婢自訟者及獄官未報一切免爲庶民夏甘露降南行唐六月黃龍見東阿秋七月威虜將軍馮駿拔江州獲田戎九月吳漢大破公孫述將謝豐於廣都斬之輔威將軍臧宮拔涪城斬公孫恢大司空李通罷冬十一月戊寅吳漢臧宮

與公孫述戰於成都大破之述被創夜死辛巳吳漢屠成都夷述宗族及延岑等十二月辛卯揚武將軍馬成行大司空事是歲九真徼外蠻夷張遊率種人內屬封爲歸漢里君省金城郡屬隴西參狼羌寇武都隴西太守馬援討降之詔邊吏力不足戰則守追虜料敵不拘以逗畱法橫野大將軍王常薨遣驃騎大將軍杜茂將衆郡施刑屯北邊築亭候修烽燧

十三年春正月庚申大司徒侯霸薨戊子詔曰往年已敕郡國異味不得有所獻御今猶未止非徒有豫養導擇之勞至乃煩擾道上疲費過所其令太官勿復受明

通志

卷六上

後漢紀六上

三

敕下以遠方口實所以薦宗廟自如舊制二月遣捕虜將軍馬武屯葭沱河以備匈奴盧芳自五原亡入匈奴丙辰詔曰長沙王興眞定王得河閒王邵中山王茂皆襲爵爲王不應經義其以興爲臨湘侯得爲眞定侯邵爲樂成侯茂爲單父侯其宗室及絕國封侯者凡一百三十七人丁巳降趙王良爲趙公太原王章爲齊公魯王興爲魯公庚午以殷紹嘉公孔安爲宋公周承休公姬常爲衛公省并西京十三國廣平屬鉅鹿眞定屬常山河閒屬信都城陽屬琅邪泗水屬廣陵淄川屬高密膠東屬北海陸安屬廬江廣陽屬上谷三月辛未沛郡

太守韓歆爲大司徒丙子行大司空馬成罷夏四月大司馬吳漢自蜀還京師於是大享將士班勞策勳功臣增邑更封凡三百六十五人其外戚恩澤封者四十五人罷左右將軍官建威大將軍耿弇罷益州傳送公孫述警師郊廟樂器葆車輿輦於是法物始備時兵革既息天下少事文書調役務從簡寡至乃十存一焉甲寅冀州牧竇融爲大司空五月匈奴寇河東秋七月廣漢徼外白馬羌豪率種人內屬九月日南徼外蠻夷獻白雉白兔冬十二月甲寅詔益州民自八年以來被略爲奴婢者皆一切免爲庶民或依託爲人下妻欲去者恣

通志

卷六上

後漢紀六上

三

聽之敢拘留者比青徐二州以略人法從事復置金城郡

十四年春正月起南宮前殿匈奴遣使奉獻使中郎將報命夏四月辛巳封孔子後志爲褒成侯越巂人任貴自稱太守遣使奉計秋九月平城人賈丹殺盧芳將尹由來降是歲會稽大疫莎車國鄯善國遣使奉獻十二月癸卯詔益梁二州奴婢自八年以來自訟在所官一切免爲庶民賣者無還直

十五年春正月辛丑大司徒韓歆免自殺了未有星孛于昴汝南太守歐陽歙爲大司徒建義大將軍朱祐罷

丁未有星孛於營室二月徙鴈門代郡上谷三郡民置
常關居庸關以東初巴蜀旣平大司馬吳漢上書請封
皇子不許重奏連歲三月乃詔羣臣議大司空融固始
侯通膠東侯復高密侯禹太常登等奏議曰古者封建
諸侯以藩屏京師周封八百同姓諸姬並爲建國夾輔
王室尊事天子享國永長爲後世法故詩云大啓爾宇
爲周室輔高祖聖德光有天下亦務親親封立兄弟諸
子不違舊章陛下德橫天地興復宗統褒德賞勳親睦
九族功臣宗室咸蒙封爵多受廣地或連屬縣今皇子
賴天能勝衣趨拜陛下恭謙克讓抑而不議羣臣百姓

通志

卷六上

後漢紀六上

三

莫不失望宜因盛夏吉時定號位以廣蕃輔明親親尊
宗廟重社稷應古合舊猷塞衆心臣請大司空融上輿
地圖太常擇日具禮儀制曰可夏四月戊申以大牢告
祠宗廟丁巳使大司空融告廟封皇子輔爲右翊公英
爲楚公陽爲東海公康爲濟南公蒼爲東平公延爲淮
陽公荆爲山陽公衡爲臨淮公焉爲左翊公京爲琅邪
公癸丑追諡兄伯升爲齊武公兄仲爲魯哀公六月庚
午復致屯騎長水射聲三校尉官改青巾左校尉爲越
騎校尉詔下州郡檢覈墾田頃畝及戶口年紀又考實
二千石長吏阿枉不平者冬十一月甲戌大司徒歐陽

歛下獄死十二月庚午關內侯戴涉爲大司徒盧芳自
匈奴入居高柳是歲驃騎大將軍杜茂免虎牙大將軍
蓋延薨

十六年春二月交阯女子徵側反略有城邑三月辛丑
晦日有食之秋九月河南尹張伋及諸郡守十餘人坐
度田不實皆下獄死郡國大姓及兵長羣盜處處竝起
攻劫在所害殺長吏郡縣追討則解散去復屯結青
徐幽冀四州尤甚冬十月遣使者下郡國聽羣盜自相
糾擿五人共斬一人者除其罪吏雖逗畱迴避故縱者
皆勿問聽以禽討爲效其牧守令長坐界內盜賊而不

通志

卷六上

後漢紀六上

五

收捕者又以畏懦捐城委守者皆不以爲負但取獲賊
多少爲殿最唯蔽匿者乃罪之於是更相追捕賊竝解
散徙其魁帥於他郡賦田受稟使安生業自是牛馬放
牧邑門不閉盧芳遣使乞降十二月甲辰封芳爲代王
初王莽亂後貨幣雜用布帛金粟是歲始行五銖錢
十七年春正月趙公良薨二月乙亥晦日有蝕之夏四
月乙卯南巡狩皇太子及右翊公輔楚公英東海公陽
濟南公康東平公蒼從幸潁川進幸葉章陵五月乙卯
車駕還宮六月癸巳臨淮公衡薨秋七月妖巫李廣等

羣起據皖城遣虎賁中郎將馬援驃騎將軍段志討之

九月破皖城斬李廣等冬十月辛巳廢皇后郭氏爲中山太后立貴人陰氏爲皇后進右翊公輔爲中山王食常山郡其餘九國公皆卽舊封進爵爲王甲申幸章陵修園廟祠舊宅觀田廬置酒作樂賞賜時宗室諸母因酣悅相與語曰文叔少時謹信與人不款曲唯直柔耳今乃能如此帝聞之大笑曰吾理天下亦欲以柔道行之乃悉爲春陵宗室起祠堂有五鳳鳳見於潁川之郟縣十二月至自章陵是歲莎車國遣使貢獻

十八年春二月蜀郡守將史歆叛遣大司馬吳漢率二將軍討之圍成都甲寅西巡狩幸長安三月壬午祠高

通志

卷六上

後漢紀六上

五

廟遂有事十一陵歷馮翊界進幸蒲阪祠后土夏四月甲戌車駕還宮癸酉詔曰今邊郡盜穀五十斛罪至於死開殘吏妄殺之路其蠲除此法同之內郡遣伏波將軍馬援率樓船將軍段志等擊交阯賊徵側等戊申幸河內戊子至自河內五月旱盧芳復亡人匈奴秋七月吳漢拔成都斬史歆等壬戌赦益州所部殊死以下冬十月庚辰幸宜城還祠章陵十二月乙丑車駕還宮是歲罷州牧置刺史

十九年春正月庚子追尊孝宣皇帝曰中宗始祠昭帝元帝於太廟成帝哀帝平帝於長安春陵節侯以下四

世於章陵妖巫單臣傅鎮等反據原武太中大夫臧宮
圍之夏四月拔原武斬臣鎮等伏波將軍馬援破交阯
斬徵側等因擊破九真賊都陽等降之閏月戊申進趙
齊魯三國公爵爲王六月戊申詔曰春秋之義立子以
貴東海王陽皇后之子宜承大統皇太子彊崇執謙退
願備藩國父子之情重久違之其以彊爲東海王立陽
爲皇太子改名莊秋九月南巡狩壬申幸南陽進幸汝
南南頓縣舍置酒會賜吏人復南頓田租歲父老前叩
頭言皇考居此日久陛下識知寺舍每來輒加厚恩願
賜復十年帝曰天下重器常恐不任日復一日安敢遠
期十歲乎吏人又言陛下實惜之何言謙也帝大笑復
增一歲進幸淮陽梁沛西南夷寇益州郡遣武威將軍
劉尚討之越嶲太守任貴謀叛十二月劉尚襲貴誅之
是歲復置函谷關都尉修西京宮室

二十年春正月戊子車駕還宮夏四月庚辰大司徒戴
涉下獄死大司空竇融免五月辛亥大司馬吳漢薨匈
奴寇上黨天水遂至扶風六月庚寅廣漢太守蔡茂爲
大司徒太僕朱浮爲大司空壬辰左中郎將劉隆爲驃
騎將軍行大司馬事乙未徙中山王輔爲沛王秋東夷
韓國人率衆詣樂浪內附冬十月東巡狩甲午幸魯進

幸東海楚沛國十二月匈奴寇天水壬寅車駕還宮是歲省五原郡徙其吏人置河東復濟陽縣徭役六歲二十一年春正月武威將軍劉尚破益州夷平之夏四月安定屬國胡叛屯聚青山遣將兵長史陳訢討平之秋鮮卑寇遼東遼東太守祭彤大破之冬十月遣伏波將軍馬援出塞擊烏桓不剋匈奴寇上谷中山其冬鄯善王車師王等十六國皆遣子入侍奉獻願請都護帝以中國初定未遑外事乃還其侍子厚加賞賜

二十二年春閏月丙戌幸長安祠高廟遂有事十一陵二月已巳至自長安夏五月乙未晦日有食之秋七月

通志

卷六上

後漢紀六上

一

司隸校尉蘇邟下獄死九月戊辰地震裂制詔曰日者地震南陽尤甚夫地者任物至重靜而不動者也而今震裂咎在君上鬼神不順無德災殃將及吏人朕甚懼焉其令南陽勿輸今年田租芻橐遺謁者按行其死罪繫囚在戊辰以前減死罪一等徒皆弛解鉗衣絲絮賜郡中居人壓死者棺錢人三千其口賦逋稅而廬宅尤破壞者勿收責吏人死亡或在壞垣毀屋之下而家羸弱不能收拾者其以見錢穀取傭爲尋求之冬十月壬子大司空朱浮免癸丑光祿勳杜林爲大司空是歲齊

王章薨青州蝗匈奴莫韃日逐王比遣使詣漁陽請和

親使中郎將李茂報命烏桓擊破匈奴匈奴北徙幕南地空詔罷諸邊郡亭侯吏卒

二十三年春正月南郡蠻叛遣武威將軍劉尚討破之徙其種人於江夏夏五月丁卯大司徒蔡茂薨秋八月丙戌大司空杜林薨九月辛未陳畱太守玉況爲大司徒冬十月丙申太僕張純爲大司空高句麗率種人詣樂浪內屬十二月武陵蠻叛寇掠郡縣遣劉尚討之戰於沅水尙軍敗沒是歲匈奴莫韃日逐王比率部曲遣使詣西河內附

二十四年春正月乙亥大赦天下匈奴莫韃日逐王比

通志

卷六上

後漢紀六上

二五

遣使款五原塞求扞禦北虜秋七月武陵蠻寇臨沅遣謁者李嵩中山太守馬成討蠻不剋於是伏波將軍馬援率四將軍討之詔有司申明舊制阿附藩王法冬十二月匈奴莫韃日逐王比自立爲單于於是分爲南北匈奴

二十五年春正月遼東徼外貊人寇右北平漁陽上谷太原遼東太守祭彤招降之烏桓大人來朝南單于遣使詣闕貢獻奉藩稱臣又遣其左賢王擊破北匈奴却地千餘里三月南單于遣子入侍戊申晦日有食之伏波將軍馬援等破武陵蠻於臨沅冬十月叛蠻悉降夫

餘王遣使奉獻是歲烏桓大人率衆內屬詣闕朝貢
二十六年春正月詔有司增百官奉其千石已上減於
西京舊制六百石已下增於舊秩初作壽陵將作大匠
竇融上言園陵廣袤無慮所用帝曰古者帝王之葬皆
陶人瓦器木車茅馬使後世之人不知其處太宗識終
始之義景帝能述遵孝道遭天下反覆而霸陵獨完受
其福豈不美哉今所制地不過二三頃無爲山陵陂池
裁令流水而已遣中郎將段郴授南單于璽綬令入居
雲中始置使匈奴中郎將將兵衛護之南單于遣子入
侍奉奏詣闕於是雲中五原朔方北地定襄鴈門上谷
邊民在中國者布還諸縣皆賜以裝錢轉輸給食

通志

卷六上

後漢紀六上

三

代八郡民歸於本土遣謁者分將施刑補理城郭發遣
二十七年夏四月戊午大司徒玉況薨五月丁丑詔曰
昔契作司徒禹作司空皆無大名其令二府去大又改
大司馬爲太尉驃騎大將軍行大司馬劉隆卽日罷以
太僕趙憙爲太尉大司農馮勤爲司徒益州郡徼外蠻
夷率種人內屬北匈奴遣使詣武威乞和親冬魯王興
齊王石始就國

二十八年春正月己巳徙魯王興爲北海王以魯國益
東海賜東海王彊虎賁旄頭鐘虛之樂夏六月丁卯沛

太后郭氏薨因詔郡縣捕王侯賓客坐死者數千人秋八月戊寅東海王彊沛王輔楚王英濟南王康淮陽王延始就國冬十月癸酉詔死罪繫囚皆一切募下蠶室其女子宮北匈奴遣使貢獻乞和親

二十九年春二月丁巳朔日有食之遣使者舉冤獄出繫囚庚申賜天下男子爵人二級鰥寡孤獨篤癯貧不能自存者粟人五斛夏四月乙丑詔令天下繫囚自殊死已下及徒各減本罪一等其餘贖罪輸作各有差

三十年春正月鮮卑大人內屬朝賀二月東巡狩甲子幸魯進幸濟南閏月癸丑車駕還宮有星孛於紫宮夏

通志

卷六上

後漢紀六上

三

四月戊子徙左翊王焉爲中山王五月大水賜天下男子爵人二級鰥寡孤獨篤癯貧不能自存者粟人五斛秋七月丁酉幸魯國復濟陽縣是年徭役冬十一月丁酉至自魯

三十一年夏五月大水戊辰賜天下男子爵人二級鰥寡孤獨篤癯貧不能自存者粟人六斛癸酉晦日有食之是夏蝗秋九月甲辰詔令死罪繫囚皆一切募下蠶室其女子宮是歲陳畱雨穀形如稗實北匈奴遣使貢獻

中元元年春正月東海王彊沛王輔楚王英濟南王康

淮陽王延趙王盱皆來朝丁卯東巡狩二月己卯幸魯
進幸太山北海王興齊王石朝於東嶽辛卯柴望岱宗
登封太山甲午禪於梁父三月戊辰司空張純薨夏四
月癸酉車駕還宮己卯大赦天下復羸博梁父奉高勿
出今年田租芻橐改年爲中元行幸長安戊子祠長陵
五月乙丑至自長安六月辛卯太僕馮魴爲司空乙未
司徒馮勤薨是歲京師醴泉涌出飲之者痼疾皆愈惟
眇蹇者不瘳又有赤草生於水厓郡國頻上嘉瑞帝常
自謙無德抑而不當故史官罕得記焉秋郡國三蝗冬
十月辛未司隸校尉東萊李訢爲司徒甲申使司空告
祠高廟曰高皇帝與羣臣約非劉氏不王呂太后賊害
三趙專王呂氏賴社稷之靈祿產伏誅天命幾墜危朝
更安呂太后不宜配食高廟同祧至尊薄太后母德慈
仁孝文皇帝賢明臨國子孫賴福延祚至今其上薄太
后尊號曰高皇后配食地祇遷呂太后廟主於園四時
上祭十一月甲子晦日有食之是歲初起明堂靈臺辟
雍及北郊兆域宣布圖讖於天下復濟陽南頓是年倭
役參狼羌寇武都敗郡兵隴西太守劉盱遣軍救之及
武都郡兵討叛羌皆破之

二年春正月辛未初立北郊祀后土東夷倭奴國王遣

通志

卷六上

後漢紀六上

三

使奉獻二月戊戌帝崩於南宮前殿年六十二遺詔曰
朕無益百姓皆如孝文皇帝制度務從約省刺史二千
石長吏皆無離城郭無遣吏及因郵奏初帝在兵閒久
厭武事且知天下疲耗思樂息肩自隴蜀平後非倣急
未嘗復言軍旅皇太子嘗問攻戰之事帝曰昔衛靈公
問陳孔子不對此非爾所及每旦視朝日昃乃罷數引
公卿郎將講論經理夜分乃寐皇太子見帝勤勞不怠
承閒諫曰陛下有禹湯之明而失黃老養性之福願頤
愛精神優游自寧帝曰我自樂此不爲疲也雖身濟大
業兢兢如不及故能明慎政體總擘權綱量時度力舉
通志

卷六上

後漢紀六上

三

無過事退功臣而進文吏戢弓矢而散馬牛雖道未方
古斯亦止戈之武焉初皇考南頓君欽爲濟陽令以建
平元年十二月甲子夜生光武於縣舍有赤光照室中
欽異焉使卜者王長占之長辟左右曰此兆吉不可言
是歲縣界有嘉禾生一莖九穗因名光武曰秀明年方
士有夏賀良者上言哀帝云漢家歷運中衰當再受命
於是改號爲太初元年稱陳聖劉太平皇帝以馱勝之
及王莽篡位忌惡劉氏以錢文有金刀故改爲貨泉字
文爲白水真人後望氣者蘇伯阿爲王莽使至南陽遙
望見春陵郭曄曰氣佳哉鬱鬱葱葱然及始起兵還春

陵遠望舍南火光赫然屬天有頃不見其後道士西門君惠李守等亦云劉秀當爲天子其王者受命信有符乎不然何以能乘時龍而御天哉范氏贊曰炎正中微大盜移國九縣飄回三精霧塞人獸淫詐神思反德光武誕命靈眈自甄沈幾先物深略緯文尋邑百萬貔虎爲羣長轂雷野高鋒彗雲英武旣振新都自焚虔劉庸代紛紜梁趙三河未澄四關重擾神旌乃顧遞行天討金湯失險車書共道靈慶旣啓人謀咸贊明明廟謨赴雄斷於赫有命系隆我漢

世祖光武皇帝建武三十一年中元二年卽位三

通志

卷六上

後漢紀六上

三

十三年

顯宗孝明皇帝諱莊光武第四子也母陰皇后帝生而豐下十歲能通春秋光武奇之建武十五年封東海公十七年進爵爲王十九年立爲皇太子師事博士桓榮學通尚書中元二年二月戊戌卽皇帝位年三十尊皇后曰皇太后三月丁卯葬光武皇帝於原陵有司奏上尊廟曰世祖夏四月丙辰詔賜天下男子爵人二級三老孝悌力田人三級爵過公乘得移與子若同產同產子及流人無名數欲自占者人一級鰥寡孤獨篤癡粟人十斛其施刑及郡國徒在中元元年四月己卯赦前

所犯而後補繫者悉免其刑又邊人遭亂爲內郡人妻
在已卯赦前一切遣還邊恣其所樂中二千石下至黃
綬貶秩贖論者悉皆秩還贖以高密侯禹爲太傅東平
王蒼爲驃騎將軍封太尉熹爲節鄉侯司徒訢爲安鄉
侯司空魴爲楊邑侯秋九月燒當羌寇隴西敗郡兵於
允街赦隴西囚徒減罪一等勿收今年租調又所發天
水三千人亦復是歲更賦遣謁者張鴻討叛羌於允吾
鴻軍大敗戰歿冬十一月遣中郎將竇固監捕虜將軍
馬武等二將軍討燒當羌十二月甲寅詔以方春戒節
其赦有司務順時氣天下亡命殊死以下聽得贖論死
通志

卷六上

後漢紀六上

五

罪入縑二十匹右趾至髡鉗城旦春十匹完城旦春至
司寇作三匹其未發覺詔書到先自告者半入贖今選
舉不實邪佞未去權門請託殘吏放手百姓愁怨情無
告訴有司明奏罪名并正舉者及郡縣每因徵發輕爲
姦利詭責羸弱先急下貧其務在均平無令枉刻

永平元年春正月帝率公卿已下朝於原陵如元會儀
夏五月太傅鄧禹薨戊寅東海王彊薨遣司空馮魴持
節視喪事賜升龍旄頭鑿輅龍旗六月乙卯葬東海恭
王秋七月捕虜將軍馬武等與燒當羌戰大破之募士
卒戍隴右賜錢人三萬八月戊子徙山陽王荆爲廣陵

王遣就國是歲遼東太守祭彤使鮮卑擊赤山烏桓大破之斬其渠帥越舊姑復夷叛州郡討平之

二年春正月辛未宗祀光武皇帝於明堂帝及公卿列侯始服冠冕衣裳玉佩絢屨以行事禮畢登靈臺使尙書令持節詔驃騎將軍三公宣布詔旨令天下自殊死已下謀反大逆皆赦除之百僚師尹其勉修厥職順行時令敬若昊天以綏兆人三月臨辟雍初行大射禮秋九月沛王輔楚王英濟南王康淮陽王延東海王政來朝冬十月壬子幸辟雍初行養老禮詔以三老李躬年耆學明五更桓榮授朕尙書宜有酬報其賜榮爵關內侯食邑五千戶三老五更皆以二千石祿養終厥身其賜天下三老酒人一石肉四十斤有司其存耆耄恤幼孤惠鰥寡稱朕意焉中山王焉始就國甲子西巡狩幸長安祠高廟遂有事於十一陵歷覽館邑會郡縣吏勞賜作樂十一月甲申遣使者以中牢祠蕭何霍光帝謁陵園過式其墓進幸河東所過賜二千石令長已下至於掾吏各有差癸卯車駕還宮十二月護羌校尉竇林下獄死是歲始迎氣於五郊少府陰就子豐殺其妻酈邑公主就坐自殺

三年春正月癸巳詔有司勉順時氣督勸農桑詳刑慎

通志

卷六上

後漢紀六上

三

罰明察單辭以稱朕意二月甲寅太尉趙憙司徒李訢
免丙辰左馮翊郭丹爲司徒己未南陽太守虞延爲太
尉甲子立貴人馬氏爲皇后皇子烜爲皇太子賜天下
男子爵人二級三老孝悌力田人三級流人無名數欲
占者人一級鰥寡孤獨篤癡貧不能自存者粟人五斛
夏四月辛酉立皇子建爲千乘王羨爲廣平王六月丁
卯有星孛于天船北秋八月戊辰改太樂爲大予樂壬
申晦日有食之詔言事者靡有所諱冬十月烝祭光武
廟初奏文始五行武德之舞甲子車駕從皇太后幸章
陵觀舊廬十二月戊辰至白章陵是歲起北宮及諸官

通志

卷六上

後漢紀六上

七

府京師及郡國七大水

四年春二月辛亥詔朕親耕籍田以祈農事而比再得
時雨宿麥潤澤其賜公卿半奉有司勉遵時政務平刑
罰秋九月戊寅千乘王建薨冬十月乙卯司徒郭丹司
空馮魴免丙辰河南尹范遷爲司徒太僕伏恭爲司空
十二月陵鄉侯梁松下獄死

五年春二月庚戌驃騎將軍東平王蒼罷歸藩琅邪王
京就國冬十月行幸鄴與趙王栩會鄴常山三老言於
帝曰上生於元氏願蒙優復詔復元氏縣田租更賦六
歲勞賜縣掾史及門閭走卒至自鄴十一月北匈奴寇

五原十二月寇雲中南單于擊却之是歲發遣邊人在內郡者賜裝錢人二萬

六年春正月沛王輔楚王英東平王蒼淮陽王延琅邪王京東海王政趙王盱北海王興齊王石來朝二月王洛山出寶鼎廬江太守獻之夏四月甲子詔太常以初祭之日陳鼎於廟以備器用賜三公帛五十匹九卿二千石半之又詔先帝詔書禁人上專言聖而閑者章奏頗多浮詞自今若有過稱虛譽尙書皆宜抑而不省示不爲諂子蚩也冬十月行幸魯東海恭王陵會沛王輔楚王英淮南王康東平王蒼淮南王延琅邪王京東海王政十二月還幸陽城遣使者祠中岳壬午車駕還宮東平王蒼琅邪王京從駕來朝皇太后

通志

卷六上

後漢紀六上

五

七年春正月癸卯皇太后陰氏崩二月庚申葬光烈皇后秋八月戊辰北海王興薨是歲北匈奴遣使乞和親八年春正月己卯司徒范滂薨三月辛卯太尉虞延爲司徒衛尉趙憙行太尉事遣越騎司馬鄭衆報使匈奴初置度遼將軍屯五原曼柏秋郡國十四雨水冬十月北宮成丙子臨辟雍養三老五更禮畢詔三公募郡國中都官死罪繫囚減罪一等勿笞詣度遼將軍營屯朔方五原之邊縣妻子自隨便占著邊縣父母同產欲相

代者恣聽之其大逆無道殊死者一切募下蠶室亡命者令贖罪各有差凡徙者賜弓弩衣糧壬寅晦日有食之既詔曰朕以無德奉承大業而下貽人怨上動三光永思厥咎在予一人羣司勉修職事極言無諱於是在位者皆上封事各言得失帝覽章深自引咎乃以所上班示百官北匈奴寇河西諸郡

九年春三月辛丑詔郡國死罪囚減罪與妻子詣五原朔方占著所在死者皆賜妻父若男同產一人復終身其妻無父兄獨有母者賜其母錢六萬又復其口算夏四月甲辰詔郡國以公田賜貧人各有差令司隸校尉部刺史歲上墨綬長吏視事三歲已上理狀尤異者各一人與計偕上及尤不政理者亦以聞是歲大有年爲四姓小侯開立學校置五經師

通志

卷六上

後漢紀六上

完

十年春二月廣陵王荆有罪自殺國除夏四月戊子詔曰昔歲五穀登衍今茲蠶麥善收其大赦天下閏月甲午南巡狩幸南陽祠章陵日北至又祠舊宅禮畢召校官弟子作雅樂奏鹿鳴帝自御塤簾和之以娛嘉賓還幸南頓勞享三老官屬冬十月徵淮陽王延會平輿徵沛王輔會睢陽十二月甲午車駕還宮

十一年春正月沛王輔楚三英濟南王康東平王蒼淮

陽王延中山王焉琅邪王京東海王政來朝秋七月司隸校尉郭霸下獄死是歲灤湖出黃金廬江太守以獻時麒麟白雉醴泉嘉禾所在出焉

十二年春正月益州徼外夷哀牢王相率內屬於是置永昌郡罷益州西部都尉夏四月遣將作謁者王吳修汴渠自滎陽至于千乘海口五月丙辰賜天下男子爵人二級三老孝悌力田人三級流民無名數欲占者人一級鰥寡孤獨篤癯貧無家屬不能自存者粟人三斛詔天下厚葬及車服侈美者令有司申明科禁宣下郡國秋七月乙亥司空伏恭罷乙未大司農牟融爲司空

通志

卷六上

後漢紀六上

四

冬十月司隸校尉王康下獄死是歲天下安平人無徭役歲比登稔百姓殷富粟斛三十牛羊被野

十三年春二月帝耕於籍田禮畢賜觀者食三月河南尹薛昭下獄死夏四月汴渠成辛巳行幸滎陽巡行河渠乙酉詔曰自汴渠決敗六十餘歲兗豫之人多被水患今旣築隄理渠絕水立門河汴分流復其舊迹陶邱之北漸就壤墳其濱渠下田悉賦予貧人無令豪右得固其利因遂度河登太行進幸上黨壬寅車駕還宮冬十月壬辰晦日有食之三公免冠自劾制曰冠履勿劾

災異屢見咎在朕躬其令刺史太守詳刑理冤存恤鰥

寡勉思厥職庶幾和穆陰陽消伏災譴焉十一月楚王英謀反廢國除遷於涇縣所連及死徙者數千人是歲齊王石薨

十四年春三月甲戌司徒虞延免自殺夏四月丁巳鉅鹿太守南陽邢穆爲司徒前楚王英自殺夏五月封故廣陵王荆子元壽爲廣陵侯初作壽陵

十五年春二月庚子東巡狩辛丑幸偃師詔亡命自殊死以下贖死罪縑四十匹右趾至髡鉗城旦舂十匹完城旦至司寇五匹犯罪未發覺詔書到日自告者半入續徵沛王輔會睢陽進幸彭城癸亥帝耕于下邳三月

通志

卷六上

後漢紀六上

聖

徵琅邪王京會良成徵東平王蒼會陽都又徵廣陵侯及其三弟會魯祠東海恭王陵還幸孔子宅祠仲尼及七十二弟子親御講堂命皇太子諸王說經又幸東平辛卯進幸大梁至定陶祠定陶恭王陵夏四月庚子車駕還宮改信都爲樂成國臨淮爲下邳國封皇子恭爲鉅鹿王黨爲樂成王衍爲下邳王暢爲汝南王昞爲常山王長爲濟陰王賜天下男子爵人三級郎從官二十歲已下帛百匹十歲已上二十四十歲已下十匹官府吏五匹書佐小史三匹令天下大酺五日乙巳大赦天下其謀反大逆及諸不應宥者皆赦除之冬車騎校獵

上林苑十二月遣奉車都尉竇固駙馬都尉耿秉屯涼州

十六年春二月遣太僕祭彤出高闕奉車都尉竇固出酒泉駙馬都尉耿秉出居延騎都尉來苗出平城伐北匈奴竇固破呼衍王於天山留兵屯伊吾盧城耿秉來苗祭彤竝無功而還夏五月淮陽王延謀反發覺癸丑司徒邗穆駙馬都射韓光坐事下獄死所連及誅死者甚衆戊午晦日有食之六月丙寅大司農西河王敏爲司徒秋七月淮陽王延徙封阜陵王九月丁卯詔令郡國中都官死罪繫囚減死罪一等勿笞詣軍營屯朔方

通志

卷六上

後漢紀六上

聖

敦煌妻子自從父母同產欲求從者悉聽之女子嫁爲人妻勿與俱謀反大逆無道不用此書是歲北匈奴寇雲中雲中太守廉范擊破之

十七年春正月甘露降於甘陵北海王睦薨二月乙巳司徒王敏薨三月癸丑汝南太守鮑昱爲司徒是歲甘露仍降樹枝內附芝草生殿前神雀五色翔集京師西南夷哀牢僮耳焦僥槃木白狼動黏諸種前後慕義貢獻西域諸國遣子入侍夏五月戊子公卿百官以帝威德懷遠祥物顯應乃竝集朝堂奉觴上壽制書追美高祖光武聖德命太常擇吉日策告宗廟其賜天下男子

爵人二級三老孝悌力田人三級流人無名數欲占者
人一級鰥寡孤獨篤癡貧不能自存者粟人三斛郎從
官視事十歲以上者帛十匹中二千石二千石下至黃
綬貶秩奉贖在去年以來皆還贖秋八月丙寅令武威
張掖酒泉敦煌及張掖屬國繫囚右趾已下任兵者皆
一切勿治其罪詣軍營冬十一月遣奉車都尉竇固駙
馬都尉耿秉騎都尉劉張出敦煌崑崙塞擊破白山虜
於蒲類海上遂入車師初置西域都護戊己校尉是歲
改天水爲漢陽郡

十八年春三月丁亥詔令天下亡命自殊死已下贖死

通志

卷六上

後漢紀六上

三

罪縲三十匹右趾至髡鉗城旦春十匹完城旦至司寇
作五匹吏人犯罪未發覺詔書到自告者半入贖夏四
月己未詔曰自春以來時雨不降宿麥傷旱秋種未下
政失厥中憂懼而已其賜天下男子爵人二級及流民
無名數欲占者人一級鰥寡孤獨篤癡貧不能自存者
粟人三斛理冤獄錄輕繫二千石分禱五嶽四瀆郡界
有名山大川能興雲致雨者長吏各潔齋禱請冀蒙嘉
澍六月己未有星孛於太微焉耆龜茲攻西域都護陳
睦悉沒其衆北匈奴及車師後王圍戊己校尉耿恭秋
八月壬子帝崩於東宮前殿年四十八遺詔無起寢廟

藏主於光烈皇后更衣別室帝初作壽陵制令流水而已石椁廣一丈二尺長二丈五尺無得起墳萬年之後埽地而祭杵水脯糝而已過百日唯四時設奠置吏卒數人供給灑埽勿開修道敢有所興作者以擅議宗廟法從事帝遵奉建武制度無敢違者後宮之家不得封侯與政館陶公主爲子求郎不許而賜錢千萬謂羣臣曰郎官上應列宿出宰百里苟非其人則民受其殃是以難之故趙稱其官民安其業遠近肅服戶口滋殖焉范氏論曰明帝善刑理法令分明日晏坐朝幽枉必達內外無佞曲之私在上無矜大之色斷獄得情號居前代十二故後之言事者莫不先建武永平之政而鍾離意宋均之徒常以察慧爲言夫豈弘人之度未優乎

明帝永平十八年卽位十八年

肅宗孝章皇帝諱炟顯宗第五子也母賈貴人永平三年立爲皇太子少寬容好儒術顯宗器重之十八年八月壬子卽皇帝位年十九尊皇后曰皇太后壬戌葬孝明皇帝於顯節陵冬十月丁未大赦天下賜民爵人二級爲父後及孝悌力田人三級脫無名數及流人欲占者人一級爵過公乘得移與子若同產子鰥寡孤獨篤癯貧不能自存者粟人二斛詔書申赦百億以行太尉

通志

卷六上

後漢紀六上

四

事節鄉侯熹爲太傅司空融爲太尉竝錄尙書事十一月戊戌以蜀郡太守第五倫爲司空詔征西將軍耿秉屯酒泉遣酒泉太守段彭敕戊己校尉耿恭討車師甲辰晦日有食之於是避正殿寢兵不聽事五日詔有司各上封事十二月癸巳有司奏言孝明皇帝聖德淳茂劬勞日昃身御澣衣食無兼珍澤臻四表遠人慕化焦僥僂耳款塞自至克伐鬼方開道西域威靈廣被無思不服以烝庶爲憂不以天下爲樂備三雍之教躬養老之禮作登歌正予樂博貫六藝不舍晝夜聰明淵塞著在圖讖至德所感通於神明功烈光於四海仁風行於

通志

卷六上

後漢紀六上

四十五

千載而深執謙謙自稱不德無起寢廟埽地而祭除日祀之法省送終之禮遂藏主於光烈皇后更衣別室天下聞之莫不悽愴陛下至孝烝烝奉順聖德臣愚以爲更衣在中門之外處所殊別宜尊廟曰顯宗其四時禘祫於光武之堂間祀悉還更衣共進武德之舞如孝文皇帝祫祭高廟故事制曰可是歲牛疫京師及三州大早詔勿收兗豫徐州田租芻橐其以見穀賑給貧人建初元年春正月詔三州郡國方春東作恐人稍受廩往來煩劇或妨耕農其各實覈尤貧者計所貸并與之流人欲歸本者郡縣其實稟令足還到聽過止官亭無

雇舍宿長吏親躬無使貧弱遺脫小吏豪右得容姦妄
詔書既下勿得稽留刺史明加督察尤無狀者丙寅詔
曰此年牛多疫疾墾田減少穀價頗貴人以流亡方春
東作宜及時務二千石勉勸農桑弘致勞來羣公庶尹
各推精誠專急人事罪非殊死須立秋案驗有司明慎
選舉進柔良退貪猾順時令理冤獄布告天下使明知
朕意酒泉太守段彭討擊車師大破之罷戍已校尉官
二月武陵豐中蠻叛三月甲寅山陽東平地震已巳詔
令太傅三公中二千石二千石郡國守相舉賢良方正
能直言極諫之士各一人夏五月辛酉初舉孝廉郎中
池籩田賦與貧人八月庚寅有星孛於天市九月永昌
哀牢夷叛冬十月武陵郡兵討叛蠻破降之十一月阜
陵王延謀反貶爲阜陵侯

二年春三月辛丑詔曰朕深惟先帝詔書每欲元元去
末歸本而今貴戚近親奢縱無度嫁娶送終僭侈自若
有司廢典莫肯舉察自今三公竝宜明糾非法宣振威
風其科條制度所宜施行在事者備爲之禁先京師而
後諸夏甲辰罷伊吾盧屯兵永昌越巂益州三郡民夷
討哀牢破平之夏四月戊子詔還坐楚淮陽事徙者四

通志

卷六上

後漢紀六上

四

百餘家令歸本郡癸巳詔齊相省水統方空穀吹綸絮
六月燒當羌叛金城太守郝崇討之敗績羌遂寇漢陽
秋八月遣行車騎將軍馬防討平之十二月戊寅有星
孛於紫宮

三年春正月己酉宗祀明堂禮畢登靈臺望雲物大赦
天下三月癸巳立貴人竇氏爲皇后賜爵人二級三老
孝悌力田人三級民無名數及流民欲占者人一級鰥
寡孤獨篤癯貧不能自存者粟人五斛夏四月己巳罷
常山呼沱石臼河漕行車騎將軍馬防破燒當羌於臨
洮閏月西域假司馬班超擊姑墨大破之冬十二月丁
酉以馬防爲車騎將軍武陵漢中蠻叛是歲零陵獻芝
草

通志

卷六上

後漢紀六上

七

四年春二月庚寅太尉牟融薨夏四月戊子立皇子慶
爲皇太子賜爵人二級三老孝悌力田人三級民無名
數及流人欲自占者人一級鰥寡孤獨篤癯貧不能自
存者粟人五斛己丑徙鉅鹿王恭爲江陵王汝南王暢
爲梁王常山王昞爲淮陽王辛卯封皇子伉爲千乘王
全爲平春王五月丙辰車騎將軍馬防罷甲戌司徒鮑
昱爲太尉南陽太守桓虞爲司徒六月癸丑皇太后馬
氏崩秋七月壬戌葬明德皇太后冬牛大疫十一月壬

成詔曰蓋三代導人教學爲本漢承暴秦褒顯儒術建立五經爲置博士其後學者精進雖曰承師亦別名家孝宣皇帝以去聖久遠學不厭博故遂立大小夏侯尙書後又立京氏易至建武中復置顏氏嚴氏春秋大小戴禮博士此皆所以扶進微學尊廣道藝也中元元年詔書五經章句煩多議欲減省至永平元年長水校尉儵奏言先帝大業當以時施行欲使諸儒共正經義令學者得以自助孔子曰學之不講是吾憂也又曰博學而篤志切問而近思仁在其中矣於戲其勉之哉於是下太常將大夫博士議郎郎官及諸生諸儒會白虎觀講議五經同異使五官中郎將魏應承制問侍中淳于恭奏帝親稱制臨決如孝宣甘露石渠故事作白虎議奏是歲甘露降泉陵洮陽二縣

通志

卷六上

後漢紀六上

四

五年春二月庚辰朔日有食之詔公卿已下其舉直言極諫能指朕過失者各一人遣詣公車朕將親覽而問焉其以巖穴爲先勿取浮華甲申詔以去秋雨澤不適今時復旱如炎如焚其令二千石理冤獄錄輕繫禱五嶽四瀆及名山能興雲致雨者務加肅敬冀蒙嘉應三月甲寅詔以吏多不良擅行喜怒或案不以罪迫脅無辜致令自殺者一歲且多於斷獄有司其議糾舉之荆

豫諸郡兵破討武陵漢中叛蠻夏五月辛亥詔曰朕思
遲直士側席異聞其先至者各以發憤吐瀉略聞子大
夫之志矣皆欲置於左右顧問省納建武詔書又曰堯
試臣以職不直以言語筆札今外官多曠竝可以補任
戊辰太傅趙憙薨冬始行月令迎氣樂是歲零陵獻芝
草有八黃龍見於泉陵西域假司馬班超擊疏勒破之
六年春二月辛卯琅邪王京薨夏五月辛酉趙王盱薨
六月丙辰太尉鮑昱薨辛未晦日有食之秋七月癸巳
以大司農鄧彪爲太尉

七年春正月沛王輔濟南王康東平王蒼中山王焉東

通志

卷六上

後漢紀六上

四

海王政琅邪王宇來朝夏六月甲寅廢皇太子慶爲清
河王立皇子肇爲皇太子己未徙廣平王羨爲西平王
秋七月飲酎高廟禘祭光武皇帝孝明皇帝甲辰詔書
追念祖考賜公錢四十萬卿半之及百官執事各有差
九月甲戌幸偃師東涉卷津至河內詔不得輒修橋道
遠離城郭遣吏逢迎刺探起居以爲煩擾所過欲令貧
弱有利無違詔書遂覽淇園己酉進幸鄴勞享魏郡守
令己下至於三老門闌走卒賜錢各有差勞賜常山趙
國吏人復元氏租賦三歲辛卯車駕還宮詔天下繫囚
減死一等勿笞詣邊戍妻子自隨占著所在父母同產

欲相從者恣聽之有不到者皆以乏軍輿論及犯殊死
一切募下蠶室其女子宮繫囚鬼薪白粲己上皆減本
罪各一等輸司寇作亡命贖死罪入縲二十匹右趾至
髡鉗城旦舂十匹完城旦至司寇三匹吏人有罪未發
覺詔書到自告者半入贖冬十月癸丑西巡狩幸長安
丙辰祠高廟遂有事十一陵遣使者祠太上皇於萬年
以中牢祠蕭何霍光進幸槐里岐山得銅器形似酒罇
獻之又獲白鹿帝曰上無明天子下無賢方伯民之無
良相怨一方斯器亦曷爲來哉又幸長平御池陽宮東
至高陵造舟於涇而還每所到幸輒會郡縣吏人勞賜
作樂十一月詔勞賜河東守令掾以下十二月丁亥車
駕還宮是歲京師及郡國螟

通志

卷六上

後漢紀六上

辛

八年春正月壬辰東平王蒼薨三月辛卯葬東平憲王
賜鑿輅龍旂夏六月北匈奴大人率衆款塞降冬十二
月甲午東巡狩幸陳雷梁國洛陽潁陽戊申車駕還宮
詔曰五經剖判去聖彌遠章句遺辭乖疑難正恐先師
微言將遂廢絕非所以重稽古求道真也其令羣儒選
高才生受學左氏穀梁春秋古文尙書毛詩以扶微學
廣異義焉是歲京師及郡國螟

元和元年春正月中山王焉來朝日南徼外蠻夷獻生

犀白雉閏月辛丑濟陰王長薨二月甲戌詔曰八政以食爲本故古者急耕稼之業致耒耜之勤頃自牛疫以來穀食連少刺史二千石不以爲負其令郡國募人無田欲徙他界就饒者悉聽之到在所賜給公田爲雇耕備賃種餉貫與田器勿收租五歲除算三年其後欲還本鄉者勿禁夏四月己卯分東平國封憲王蒼子尙爲任城王六月辛酉沛王輔薨秋七月丁未詔曰律云掠者唯得榜笞立又令丙箠長短有數自往者大獄以來掠考多酷鉗鑽之屬慘苦無極念其痛毒恍然動心書曰鞭作官刑豈云若此宜及秋冬理獄明爲其禁八月

通志

卷六上

後漢紀六上

五

甲子太尉鄧彪罷大司農鄭弘爲大尉癸酉詔改建初九年爲元和元年郡國中都官繫囚減死一等勿笞詣邊縣妻子自隨占著在所其犯殊死一切募下蠶室其女子宮繫囚鬼薪白粲以上皆減本罪一等輸司寇作亡命者贖各有差丁酉南巡狩詔所經道上郡縣無得設儲時命司空自將徒支柱橋梁有遺使奉迎探知起居二千石當坐其賜鰥寡孤獨不能自存者粟人五斛九月乙未東平王忠薨辛丑幸章陵祠舊宅園廟見宗室故人賞賜各有差冬十月乙未巡幸江陵詔廬江太守祠南嶽又詔長沙零陵太守祠長沙定王春陵節侯

鬱林府君還幸宛十一月己丑車駕還宮賜從者各有差十二月壬子詔諸以前妖惡禁錮者一皆蠲除之竝得敘用但不得在宿衛而已

二年春正月乙酉詔曰令云有產子者復勿算三歲今諸懷妊者賜胎養穀人三斛復其夫勿算一歲著以爲令又詔三公曰方春生養萬物芴甲宜助萌陽以育時物其令有司罪非殊死且勿案驗及吏人條書相告不得聽受冀以息事寧人敬奉天氣立秋如故夫俗吏矯飾外貌似是而非朕甚厭之安靜之吏悃幅無華日計不足月計有餘如襄城令劉方

方字伯兄平原人

吏人同聲謂

通志

卷六上

後漢紀六上

五

之不煩雖未有他異斯亦殆近之矣夫以苛爲察以刻爲明以輕爲德以重爲威四者或興則下有怨心吾詔書數下冠蓋接道而吏不加理人或失職其咎安在勉思舊令稱朕意焉二月甲寅始用四分歷詔曰今山川鬼神應典禮者尙未咸秩其議增修羣祀以旗豐年丙辰東巡狩己未鳳凰集肥城乙丑帝耕於定陶詔曰三老尊年也孝悌淑行也力田勤農也國家甚休之其賜帛人一匹勉率農功使使者祠唐堯於成陽靈臺辛未幸太山柴告岱宗有黃鵠三十從西南來經祠壇上東北過於宮屋朔朔升降進幸奉高壬申宗祀五帝於汶

上明堂癸酉告祠二祖四宗大會內外羣臣丙子詔大赦天下諸犯罪不當得赦者皆除之復博奉高贏無出今年田租芻橐戍寅進幸濟南三月己丑進幸魯祠東海恭王陵庚寅祠孔子於闕里及七十二弟子賜褒成侯及諸孔男女帛壬辰進幸東平祠憲王陵甲午遣使者祠定陶太后恭王陵乙未幸東阿北登太行山至天井關夏四月乙巳客星入紫宮乙卯車駕還宮庚申假於祖禰告祠高廟五月戊申詔曰乃者鳳凰黃龍鸞鳥比集七郡或一郡再見及白鳥神雀甘露屢臻祖宗舊時或班恩施其賜天下吏爵人三級高年鰥寡孤獨帛

通志

卷六上

後漢紀六上

三

人一匹經曰無侮鰥寡惠此惇獨加賜河南女子百戶牛酒令天下大酺五日賜公卿已下錢帛各有差及洛陽人當酺者布戶一匹城外三戶共一匹賜博士員弟子見在太學者布人三匹令郡國上明經者口十萬以上五人不滿十萬三人改廬江爲六安國江陵復爲南郡徙江陵王恭爲六安王秋七月庚子詔曰春秋於春每月書王者重三正慎三微也律十二月立春不以報囚月令冬至之後有順陽助生之文而無鞠獄斷刑之政朕恣訪儒雅稽之典籍以爲王者生殺宜順時氣其定律無以十一月十二月報囚九月壬辰詔鳳凰黃龍

所見亭部無出二年租賦加賜男子爵人二級先見者
帛二十匹近者三匹太守三十匹令長十五匹丞尉半
之他如賜爵故事丙申徵濟南王康中山王焉會烝祭
冬十一月壬辰日南至初閉關梁

三年春正月乙酉詔嬰兒無父母親屬及有子不能養
食者稟給如律丙申北巡狩濟南王康中山王焉西平
王羨六安王恭樂成王黨淮陽王昞任城王尚沛王定
皆從辛丑帝耕於懷二月壬寅告常山魏郡清河鉅鹿
平原東平郡太守相曰朕前祠園陵遂望祀華霍東柴
岱宗爲人所福今將禮常山遂徂北土歷魏郡經平原

通志

卷六上

後漢紀六上

五

升踐隄防詢訪耆老月令孟春善相邱陵土地所宜今
肥田尙多未有墾闢其悉以賦貧民給與糧種務盡地
力勿令游手所過縣邑聽半入今年田租以勸農夫之
勞乙丑敕侍御史司空曰方春所過無得有所伐殺車
可以引避引避之駢馬可輟解輟解之詩云敦彼行葦
牛羊勿踐履禮人君伐一草木不時謂之不孝俗知順
人莫知順天其明稱朕意戊辰進幸中山遣使者祠北
嶽出長城癸酉還幸元氏祠光武顯宗於縣舍正堂明
日又祠顯宗於始生堂皆奏樂三月丙子詔高邑令祠
光武卽位壇復元氏七年徭役已卯進幸趙庚辰祠旁

山於靈壽辛卯車駕還宮賜從行者各有差夏四月丙寅太尉鄭弘免大司農宋由爲太尉五月丙子司空第五倫罷太僕袁安爲司空秋八月乙丑幸安邑觀鹽池九月至自安邑冬十月北海王基薨燒當羌叛寇隴西是歲西域長史班超擊斬疏勒王

章和元年春三月護羌校尉傅育追擊叛羌戰殁夏四月丙子令郡國中都事繫囚減死一等詣金城戍六月戊辰司徒桓虞免癸卯司空袁安爲司徒光祿勳任隗爲司空秋七月癸卯齊王晃有罪貶爲蕪湖侯壬子淮陽王昞薨鮮卑擊破北單于斬之燒當羌寇金城護羌

通志

卷六上

後漢紀六上

五

校尉劉盱討之斬其渠帥壬戌詔曰朕以不德受祖宗弘烈乃者鳳凰仍集麒麟並臻甘露霄降嘉穀滋生芝草之類歲月不絕朕夙夜祇畏上天無以彰於先功今改元和四年爲章和元年秋令是月養衰老授几杖行糜粥飲食其賜高年二人共布帛各一匹以爲醴酪死罪囚犯法在丙子赦前而後捕繫者皆減死勿笞詣金城戊八月癸酉南巡狩壬午遣使者祠昭靈后於小黃

園

小黃縣屬陳留郡昭靈后高祖母起兵時死小黃北後爲作園廟於小黃柵

甲申徵任城

王尚會睢陽戊子幸梁己丑遣使祠沛高原廟豐枌榆

社枌榆社高祖里

社在豐縣東北

乙未幸沛祠獻王陵徵會東海王政

乙未晦日有食之九月庚子幸城彭東海王政沛王定
任城王尚皆從辛亥幸壽春壬子詔郡國中都官繫囚
減死罪一等詣金城戍犯殊死者一切募下蠶室其女
子宮擊囚鬼薪白粲已上減罪一等輸司寇作亡命者
贖死罪縑二十匹右趾至髡鉗城旦春七匹完城旦至
司寇三匹吏民犯罪未發覺詔書到自告者半入贖復
封阜陵侯延爲阜陵王己未幸汝陰冬十月丙子車駕
還宮北匈奴屋蘭儲等率衆降是歲西域長史班超擊
莎車大破之月氏國遣使獻扶拔師子

二年春正月濟南王康阜陵王延中山王焉來朝壬辰

通志

卷六上

後漢紀六上

美

帝崩於章德前殿年三十三遺詔無起寢廟一如先帝
法制范氏論曰魏文帝稱明帝察察章帝長者章帝素
知人獸明帝苛切事從寬厚感陳寵之義除慘獄之科
深元元之愛著胎養之令奉承明德太后盡心孝道割
裂名都以崇建周親平徭簡賦而人賴其慶又體之以
忠恕文之以禮樂故乃藩輔克諧羣后德讓謂之長者
不亦宜乎在位十三年郡國所上符瑞合於圖書者數
百千烏呼懋哉

章帝建初八年元和三年章和二平卽位十三年

孝和皇帝諱肇肅宗第四子也母梁貴人爲竇皇后所

譖憂卒竇后養帝以爲己子建初七年立爲皇太子章
和二年二月壬辰卽皇帝位年十歲尊皇后曰皇太后
太后臨朝三月丁酉改淮陽爲陳國楚郡爲彭城國西
平并汝南郡六安復爲廬江郡遺詔徙西平王羨爲陳
王六安王恭爲彭城王癸卯葬孝章皇帝於敬陵庚戌
皇太后詔曰皇帝幼年惇惇在疚朕且佐助聽政然守
文之際必有內輔以參聽斷故太尉鄧彪聰明康彊老
成黃耆其以彪爲太傅賜爵關內侯錄尚書事百官總
已以聽朕庶幾得專心內位羣公其勉率百僚各修厥
職以稱朕意焉辛酉有司上奏孝章皇帝崇弘鴻業德
化普洽垂意黎民畱念稼穡文加殊俗武暢方表戒惟
人面無思不服巍巍蕩蕩莫與比隆周頌曰於穆清廟
肅雝顯相請上尊廟曰肅宗共進武德之舞制曰可癸
亥陳王羨彭城王恭樂成王黨下邳王衍梁王暢始就
國夏四月丙子謁高廟丁丑謁世祖廟戊寅詔曰先帝
探觀孝武黃帝舊典復收鹽鐵之利以備不虞而吏多
不良動失其便以違上意先帝恨之故遺戒郡國罷鹽
鐵之禁縱民煮鑄入稅縣官如故事其申敕刺史二千
石奉順聖旨勉弘德化布告天下使明知朕意五月京
師旱詔長樂少府桓郁侍講禁中冬十月乙亥以侍中

通志

卷六上

後漢紀六上

七

竇憲爲車騎將軍伐北匈奴安息國遣使獻師子扶拔
永元元年春三月甲辰初令郎官詔除者得占丞尉以
比秩爲眞夏六月車騎將軍竇憲出雞鹿塞度遼軍將
鄧鴻出柁陽塞南單于出滿夷谷與北匈奴戰於稽落
山大破之追至和渠北鞬海竇憲遂登燕然山刻石勒
功而還北單于遣弟右温禺鞬王奉奏貢獻秋七月乙
未會稽山崩閏月丙子詔以北虜破碎令有司案舊典
告類薦功以章休烈九月庚申以車騎將軍竇憲爲大
將軍以中郎將劉尚爲車騎將軍冬十月令郡國弛刑
輸作官營其徙出塞者刑雖未竟皆免歸田里庚子阜
陵王延薨是歲郡國九大水

通志

卷六上

後漢紀六上

五

二年春正月丁丑大赦天下二月壬午日有食之己亥
復置西河上郡屬國都尉官夏五月庚戌分太山爲濟
北國分樂成涿郡勃海爲河間國丙辰封皇帝弟壽爲
濟北王開爲河間王淑爲城陽王紹封故淮南王昞子
側爲常山王賜公卿已下至佐史錢布各有差己未遣
副校尉閻贛討北匈奴取伊吾廬地丁卯紹封故齊王
晃子無忌爲齊王北海王睦子威爲北海王車師前後
王竝遣子入侍月氏國遣兵攻西域長史班超超擊降
之六月辛卯中山王焉薨秋七月乙卯大將軍竇憲出

屯涼州九月北匈奴遣使稱臣冬十月遣行中郎將班固報命南單于遣左谷蠡王師子出雞鹿塞擊北匈奴於河雲北大破之

三年春二月甲子皇帝加元服賜諸侯王公將軍特進中二千石列侯宗室子孫在京師奉朝請者黃金將大夫郎吏從官帛賜民爵及粟帛各有差大酺五日郡國中都官繫囚死罪贖縑至司寇及亡命各有差庚辰賜京師民酺布兩戶共一匹二月大將軍竇憲遣左校尉耿夔出居延塞圍北單于於金微山大破之獲其母闕氏夏六月辛卯尊皇太后母比陽公主爲長公主辛丑

通志

卷六上

後漢紀六上

五

阜陵王种薨冬十月癸未行幸長安詔曰北狄破滅名王仍降西域諸國納質內附豈非祖宗迪哲重光之鴻烈歟寤寐歎息想望舊京其賜所過二千石長吏已下及三老官屬錢帛各有差鰥寡孤獨篤癯貧不能自存者粟人三斛十一月癸卯祠高廟遂有事十一陵詔曰高祖功臣蕭曹爲首有傳世不絕之義曹相國後容城侯無嗣朕望長陵東門見二臣之壟循其遠節每有感焉忠義獲寵古今所同可遣使者以中牢祠大鴻臚求近親宜爲嗣者須景風紹封以章厥功十二月復置西域都護騎都尉戊己校尉官庚辰至自長安滅弛刑徒

從駕者刑五月

四年春正月北匈奴右谷蠡王於除鞬自立爲單于款塞乞降遣大將軍左校尉耿夔授璽綬三月癸丑司徒袁安薨閏月丁丑太常丁鴻爲司徒夏四月丙辰大將軍竇憲還至京師六月戊戌朔日有食之丙辰郡國十三地震竇憲潛圖弑逆庚申幸北宮詔收捕憲黨射聲校尉郭璜子侍中舉衛尉鄧疊弟步兵校尉磊皆下獄死使謁者僕射收憲大將軍印綬遣憲及弟篤景就國到皆自殺是夏旱蝗秋七月己丑太尉宋由坐黨憲自殺八月辛亥司空任隗薨癸丑大司農尹睦爲太

通志

卷六上

後漢紀六上

字

尉錄尚書事丁巳賜公卿已下至佐史錢穀各有差冬十月己亥宗正劉方爲司空十二月壬辰詔今年郡國秋稼爲旱蝗所傷其什四以上勿收田租芻橐有不滿者以實除之武陵零陵澧中蠻叛燒當羌寇金城

五年春正月乙亥宗祀五帝於明堂遂登靈臺望雲物大赦天下戊子千乘王伉薨辛卯封皇弟萬茂爲廣宗王二月戊戌詔有司省減內外廩及梁州諸苑馬自京師離宮果園上林廣成園悉以假貧民恣得采捕不收其稅丁未詔曰去年秋麥入少恐民食不足其上尤貧不能自給者戶口人數往者郡國上貧民以衣履繡鬻

爲賞而豪右得其饒利詔書實覈欲有以益之而長吏不能躬親反更徵召會聚令失農作愁擾百姓若復有犯者二千石先坐甲寅太傅鄧彪薨戊午隴西地震三月戊子詔郡國二千石不以選舉爲憂司隸校尉不以糾察爲負是以庶官多非其人下民被姦邪之傷由法不行故也庚寅遣使者分行貧民舉實流冗開倉賑稟三十餘郡夏四月壬子封阜陵王种兄魴爲阜陵王六月丁酉郡國三雨雹秋九月辛酉廣宗王萬歲薨無子國除匈奴單于於除鞬叛遣中郎將任尙討滅之壬午令郡縣勸民蓄蔬食以助五穀其官有陂池令得采取

通志

卷六上

後漢紀六上

空

勿收假稅二歲冬十月辛未太尉尹睦薨十一月乙丑太僕張酺爲太尉是歲武陵郡兵破叛蠻降之護羌校尉賈友討燒當羌乃遯去南單于安國叛骨都侯喜斬之

六年春正月永昌徼外夷遣使譯獻犀牛大象已卯司徒丁鴻薨二月乙未遣謁者分行稟貸三河兗冀青州貧民許侯馬光自殺丁未司空劉方爲司徒太常張奮爲司空三月庚寅詔流民所過郡國皆實稟之其有販賣者勿出租稅又欲就賤還歸者復一歲田租更賦丙寅詔以陰陽不和水旱違度其令三公中二千石二千

石內郡守相舉賢良方正能直言極諫之士各一人昭
巖穴披幽隱遣詣公車朕將悉聽焉帝乃親臨策問選
補郎吏夏四月蜀郡徼外羌率種人遣使內附五月城
陽王淑薨無子國除六月己酉初令伏閉盡日秋七月
京師旱詔中都官徒各除半刑謫其未竟五月己下皆
免遣丁巳幸洛陽寺錄囚徒舉寃獄收洛陽令下獄抵
罪司隸校尉河南尹皆左降未及還宮而澍雨西城都
護班超大破焉耆尉犁斬其王自是西域降服納質者
五十餘國南單于安國從弟子逢侯率叛胡亡出塞九
月癸丑以光祿勳鄧鴻行車騎將軍事與越騎校尉馮
柱行度遼將軍朱徽使匈奴中郎將杜崇討之冬十一
月護烏桓校尉任尙率烏桓鮮卑大破逢侯馮柱遣兵
追擊獲之詔以渤海郡屬冀州武陵漢中蠻叛郡兵討
平之

通志

卷六上

後漢紀六上

三

七年春正月行車騎將軍鄧鴻度遼將軍朱徽中郎將
杜崇皆下獄死夏四月辛亥朔日有食之帝引見公卿
問得失令將大夫御史謁者博士議郎郎官會廷中各
言封事詔有司詳選郎官寬博有謀才任典城者三十
人旣而悉以所選郎出補長相五月辛卯改千乘國爲
樂安國六月丙寅沛王定薨秋七月乙巳易陽地裂九

月癸卯京師地震

八年春二月己丑立貴人陰氏爲皇后賜天下男子爵
人二級三老孝悌力田三級民無名數及流民欲占者
一級鰥寡孤獨篤癰貧不能自存者粟人五斛夏四月
癸亥樂成王黨薨甲子詔賑貸并州四郡貧民五月河
內陳雷蝗南匈奴右温禺犢王叛爲寇秋七月行度遼
將軍龐奮越騎校尉馮柱追討之斬右温禺犢王車師
後王叛擊其前王八月辛酉飲酎詔郡國中都官繫囚
減死一等詣敦煌戍其犯大逆募下蠶室其女子宮自
死罪已下至司寇及亡命者入贖各有差九月京師蝗

通志

卷六上

後漢紀六上

三

吏民言事者多歸責有司詔百僚師尹勉修厥職刺史
二千石詳刑辟理寃虐恤鰥寡矜孤弱思惟致災興蝗
之咎庚子復置廣陽郡冬十月乙丑北海王威有罪自
殺十二月辛亥陳王羨薨丁巳南宮宣室殿火

九年春正月永昌徼外蠻夷及捍國重譯奉貢三月庚
辰隴西地震癸巳濟南王康薨西域長史王林擊車師
後王斬之夏四月丁卯封樂成王黨子巡爲樂成王六
月蝗旱戊辰詔今年秋稼爲蝗蟲所傷皆勿收租更芻
橐若有所損失以實除之餘當收租者亦半入具山林
饒利陂池漁采以贍元元勿收假稅秋七月蝗蟲飛過

京師八月鮮卑寇肥如遼東太守祭參下獄死閏月辛巳皇太后竇氏崩丙申葬章德皇后燒當羌寇隴西殺長吏遣行征西將軍劉尚越騎校尉趙世等討破之九月庚申司徒劉方策免自殺甲子追尊皇妣梁貴人爲皇太后冬十月乙酉改葬恭懷梁皇后於西陵十一月癸卯光祿勳河南呂蓋爲司徒十二月丙寅司空張奮罷壬申太僕韓稜爲司空己丑復置若盧獄官

十年春三月壬戌詔刺史二千石隨宜疏導溝渠毋得因緣妄發以爲煩擾夏五月京師大水秋七月己巳司空韓稜薨八月丙子太常太山巢堪爲司空九月庚戌復置廩犧官冬十月五州雨水十二月燒當羌豪迷唐等率種人詣闕貢獻戊寅梁王暢薨

通志

卷六上

後漢紀六上

五

十一年春二月遣使循行郡國稟貸被災害不能自存者令得漁采山林池澤不收假稅丙午詔郡國中都官徒及篤癡老小女徒各除半刑其未竟三月者皆免歸田里夏四月丙寅大赦天下己巳復置右校尉官秋七月辛卯詔以吏民逾僭厚死傷生有司不舉怠放日甚又商賈小民或忘法禁奇巧靡貨流積公行其在位犯者當先舉正市道小民但且申明憲綱勿因科令加虐

羸弱

十二年春二月旄牛徼外白狼獾薄夷率種人內屬詔
貸被災諸郡民種糧賜下貧鰥寡孤獨不能自存者及
郡國流民聽入陂池漁采以助蔬食三月丙申詔書切
責三公不能承天安人有司競爲苛暴侵愁小民將何
以救咎罰其賜天下男子爵人二級三老孝悌力田三
級民無名數及流民欲占者人一級鰥寡孤獨篤癯貧
不能自存者粟人三斛壬子賜博士員弟子在太學者
布人三匹夏四月日南象林蠻夷反郡兵討破之閏月
賑貸敦煌張掖五原民下貧者穀戊辰秭歸山崩六月
舞陽大水賜被水災尤貧者穀人三斛秋七月辛亥朔
日有食之九月丙午太尉張酺免丙寅大司農張禹爲
太尉冬十一月西域蒙奇兜勒二國遣使內附賜其王
金印紫綬是歲燒當羌復叛

通志

卷六上

後漢紀六上

五

十三年春正月丁丑帝幸東觀覽書林閱篇籍博選術
藝之士以充其官二月任城王尙薨丙午賑貸張掖居
延朔南日南貧民及孤寡羸弱不能自存者秋八月詔
象林民失農桑業者賑貸種糧稟賜下貧穀食己亥北
宮盛饌門閤火護羌校尉周鮪擊燒當羌破之荊州雨
水九月壬子詔曰荊州比歲不節今茲淫水爲害餘雖
頗登而多不均浹深惟四民農食之本慘然懷矜其令

天下半入今年田租芻橐有宜以賓除者如故事貧民假種食皆勿收責冬十一月安息國遣使獻師子及條枝大爵丙辰詔曰幽并涼州戶口率少邊役衆劇束脩良吏進仕路狹撫接夷狄以人爲本其令緣邊郡口十萬以上歲舉孝廉一人不滿十萬二歲舉一人五萬以下三歲舉一人鮮卑寇右北平遂入漁陽漁陽太守擊破之戊辰司徒呂蓋罷十二月丁丑光祿勳魯恭爲司徒辛卯巫蠻叛寇南郡

十四年春二月乙卯東海王政薨繕脩故海西郡徙金城西部都尉以戌之三月戊辰臨辟雍享射大赦天下

通志

卷六上

後漢紀六上

突

夏四月遣使者督荊州兵討巫蠻破降之庚辰賑貸張掖居延敦煌五原漢陽會稽流民下貧穀各有差五月丁未初置上林將兵長史官六月辛卯廢皇后陰氏后父特進綱自殺秋七月甲寅詔復象林縣更賦田租芻橐二歲壬子常山王側薨是秋三州雨水冬十月甲申詔兗豫荊州今年雨水淫過多傷農功其令被害什四以上皆半入田租芻橐其不滿者以賓除之辛丑立貴人鄧氏爲皇后丁酉司空巢堪罷十一月癸卯大司農徐防爲司空是歲初復郡國上計補郎官

十五年春閏月乙未詔流民欲歸還本而無糧食者過

所實稟之疾病加致醫藥其不欲還歸者勿彊二月詔
稟貸潁川汝南陳畱江夏梁國敦煌貧民夏四月甲子
晦日有食之五月戊寅南陽大風六月詔令百姓鰥寡
漁采陂池勿收假稅二歲秋七月丙寅濟南王錯薨復
置涿郡故鹽鐵官九月壬午南巡狩清河王慶濟北王
壽河間王開竝從賜所過二千石長吏以下三老官屬
及民百年者錢布各有差是秋四州雨水冬十一月戊
申幸章陵祠舊宅癸丑祠園廟會宗室於舊廬勞賜作
樂戊午進幸雲夢臨漢水而還十一月甲申車駕還宮
賜從臣及畱者公卿已下錢布各有差十二月庚子琅
邪王宇薨有司奏以爲夏至則微陰起靡草死可以決
小事是歲初令郡國以日北至案薄刑

十六年春正月己卯詔貧民有田業而以匱乏不能自
農者貸種糧二月己未詔兗豫徐冀四州比年雨多傷
稼禁酤酒夏四月遣三府掾分行四州貧民無以耕者
爲雇犁牛直五月壬午趙王商薨秋七月旱戊午詔曰
今秋稼方穗而旱雲雨不霑疑吏行慘刻不宜恩澤妄
拘無罪幽閉良善所致其一切囚徒於法疑者勿決以
奉秋令方察煩苛之吏顯明其罰辛酉司徒魯恭免庚
午光祿勳張酺爲司徒辛巳詔令天下皆半入今年田

通志

卷六上

後漢紀六上

七

租芻橐其被災害者以實除之貧民受貸種糧及田租芻橐皆勿收責八月己酉司徒張酺薨冬十月辛卯司空徐防爲司徒大鴻臚陳寵爲司空十一月己丑行幸緱氏登百岷山賜百官從臣布各有差北匈奴遣使稱臣貢獻十二月復置遼東西部都尉官

元興元年春正月戊午引三署郎召見禁中選除七十五人補謁者長相高句驪寇郡界夏四月庚午大赦天下改元元興宗室以罪絕者悉復屬籍五月癸酉雍地裂秋九月遼東太守耿夔擊貊人破之冬十二月辛未帝崩于章德前殿年二十七立皇子隆爲皇太子賜天

通志

卷六上

後漢紀六上

空

下男子爵人三級三老孝悌力田人三級民無名數及流民欲占者人一級鰥寡孤獨篤癡貧不能自存者粟人三斛自竇憲誅後帝躬親萬機每有災異輒延問公卿極言得失前後符瑞八十一所每稱德薄皆抑而不宣舊南海獻龍眼荔枝十里一置五里一候奔騰阻險死者繼路時臨武長汝南唐羌縣接南海乃上書陳狀帝下詔曰遠國珍羞本以薦奉宗廟苟有傷害豈愛民之本其敕太官勿復受獻由是遂省焉

和帝永元十六年元興元年卽位十七年

孝殤皇帝諱隆和帝少子也元興元年十二月辛未夜

帝卽皇帝位時誕育百餘日尊皇后曰皇太后太后臨朝北匈奴遣使稱臣詣敦煌奉獻

延平元年春正月辛卯太尉張禹爲太傅司徒徐防爲太尉參錄尙書事百官總已以聽封皇兄勝爲平原王癸卯光祿勳梁鮪爲司徒三月甲申葬孝和皇帝于慎陵尊廟曰穆宗丙戌清河王慶濟北王壽河閒王開常山王章始就國夏四月庚申詔罷祀官不在祀典者鮮卑寇漁陽漁陽太守張顯追擊戰歿丙寅以虎賁中郎將鄧騭爲車騎將軍司空陳寵薨五月辛卯皇太后詔曰皇帝幼冲承統鴻業朕且佐助聽政嘉與吏民更始

通志

卷六上

後漢紀六上

完

其大赦天下自建武以來諸犯禁錮詔書雖解有司持重多不奉行其皆復爲平民壬辰河東垣山崩六月丁未太常尹勤爲司空郡國三十七雨水已未詔減太官導官尙方內署諸服御珍膳靡麗難成之物丁卯詔司徒大司農長樂少府曰朕深惟治道先內後外自建武之初以至于今八十餘年宮人歲增房御彌廣又宗室坐事沒入者猶託名公族甚可愍焉今悉免遣及掖庭宮人皆爲庶民以紓幽隔鬱滯之情諸官府郡國三侯家奴婢姓劉及疲癯羸老皆上其名務令實悉秋七月庚寅敕司隸校尉部刺史曰夫天降災戾應政而至閒

者郡國或有水災妨害秋稼朝廷惟咎憂惶悼懼而郡國欲獲豐穰虛飾之譽遂覆蔽災害多張墾田不揣流亡競增戶口掩匿盜賊令姦惡無懲署用非次選舉乖宜貪苛慘毒延及平民刺史垂頭塞耳阿私下比不畏于天不媿于人假貸之恩不可數恃自今以後將糾其罰二千石長吏其名實覈所傷害爲除田租芻橐八月辛亥帝崩癸丑殯于崇德前殿年二歲

殤帝延平一年

恭宗孝安皇帝諱祐肅宗孫也父清河孝王慶母左姬帝自在邸第數有神光照室又有赤蛇盤於牀第之間

通志

卷六上

後漢紀六上

五

年十歲好讀史書和帝稱之數見禁中延平元年慶始就國鄧太后特詔留帝清河邸八月殤帝崩太后與兄車騎將軍鄧騭定策禁中其夜使騭持節以王青蓋車迎帝齋于殿中皇太后御崇德殿百官皆吉服羣臣陪位引拜帝爲長安侯皇太后詔曰先帝聖德淑茂早棄天下朕奉皇帝夙夜瞻仰日月冀望成就豈意卒然顛沛天年不遂悲痛斷心朕深惟平原王素被痼疾念宗廟之重思繼嗣之統唯長安侯祐質性忠孝小心翼翼能通詩論篤學樂古仁惠愛下年已十三有成人之志親德繫後莫宜於祐禮昆弟之子猶已子春秋之義爲

人後者爲之子不以父命辭王父命其以祐爲孝和皇帝嗣奉承祖宗案禮儀奏又作策命曰惟延平元年秋八月癸丑皇太后曰咨長安侯祐孝和皇帝懿德巍巍光于四海大行皇帝不永天命朕惟侯孝章帝世嫡皇孫謙恭慈順在孺而勤宜奉郊廟承統大業今以侯嗣孝和皇帝後其審君漢國允執其中一人有慶萬民賴之皇帝其勉之哉讀策畢太尉奉上璽綬卽皇帝位年十三太后猶臨朝九月庚子謁高廟辛丑謁元武廟六州大水己未遣謁者分行虛實舉災害賑乏絕丙寅葬孝殤皇帝于康陵乙亥隕石于陳畱西域諸國叛攻都

通志

卷六上

後漢紀六上

五

護任尙遣副校尉梁懂救尙擊破之冬十月四州大水雨雹詔以宿麥不下賑賜貧人十二月甲子清河王薨使司空持節弔祭車騎將軍鄧騭護喪事乙酉罷魚龍曼延百戲

永初元年春正月癸酉朔大赦天下蜀郡徼外羌內屬戊寅分犍爲南部爲屬國都尉稟司隸兗豫徐冀并州貧民三月丙午以廣成游獵地及被災郡國公田假與貧民丁卯分清河國封帝弟常保爲廣川王庚午司徒梁鮪薨三月癸酉日有食之詔公卿內外衆官郡國守相舉賢良方正有道術之士明正術達古今能直言極

諫者各一人巳卯永昌徼外雋僥種夷貢獻內屬甲申
葬清河孝王贈龍旗虎賁夏五月甲戌長樂衛尉魯恭
爲司徒丁丑詔封北海王睦孫壽光侯普爲北海王丸
眞徼外夜郎蠻夷舉土內屬六月戊申爵皇太后母陰
氏爲新野君丁巳河東地陷壬戌罷西域都護先零種
羌叛斷隴道大爲寇掠遣車騎將軍鄧騭征西校尉任
尙討之丁卯赦除諸羌相連結謀叛逆者罪秋九月庚
午詔三公明申舊令禁奢侈無作浮巧之物殫財厚葬
是日太尉徐防免辛未司空尹勤免癸酉調揚州五郡
租米贍給東郡濟陰陳畱梁國下邳山陽丁丑詔曰自

通志

卷六上

後漢紀六上

三

今長吏被考竟未報自非父母喪無故輒去職者劇縣
十歲平縣五歲以上乃得次用壬午詔太僕少府減黃
門鼓吹以補羽林士廐馬非乘輿常所御者皆減半食
諸所造作非供宗廟園陵之用皆且止丙戌詔死罪以
下及亡命贖各有差庚寅太傅張禹爲太尉太常周章
爲司空冬十月倭國遣使奉獻辛酉新城山泉水大出
十一月丁亥司空周章密謀廢立策免自殺戊子敕司
隸校尉冀并二州刺史民訛言相驚棄捐舊居老弱相
攜窮困道路其各敕所部長吏躬親曉諭若欲歸本郡
在所爲封長檄不欲勿彊十二月乙卯潁川太守張敏

爲司空是歲郡國十八地震四十一雨水或山水暴至
二十八 大風雨雹

二年春正月稟河南下邳東萊河內貧民車騎大將軍
鄧騭爲種羌所敗於冀西二月乙丑遣光祿大夫樊準
呂倉分行冀竟二州稟貸流民夏四月甲寅漢陽城中
火燒殺三千五百七十人五月旱丙寅皇太后幸洛陽
寺及若盧獄錄囚徒賜河內尹廷尉卿及官屬以下各
有差卽日降雨六月京師及郡國四十大水大風雨雹
秋七月戊辰詔百僚及郡國吏民有道術明習災異陰
陽之度璇璣之數者各使指變以聞二千石長吏明以

通志

卷六上

後漢紀六上

五

詔書博衍幽隱朕將親覽待以不次冀獲嘉謀以承天
誠閏月辛丑廣川王常保薨無子國除癸未蜀郡徼外
羌舉土內屬九月庚子詔王主官屬墨綬下至郎謁者
其經明任博士居鄉里有廉清孝順之稱才任理人者
國相歲移名與計偕上尙書公府通調令得外補冬十
月庚寅稟濟陰山陽元菟貧民征西校尉任尙與先零
羌戰于平襄尙軍敗績十一月辛酉拜鄧騭爲大將軍
徵還京師畱任尙屯隴右先零羌滇零稱天子於北地
遂寇三輔東犯趙魏南入益州殺漢中太守董炳十二
月辛卯稟東郡鉅鹿廣陽安定定襄沛國貧民廣漢塞

外參狼羌降分廣漢北部爲屬國都尉是歲郡國十二地震

三年春正月庚子皇帝加元服大赦天下賜王主貴人公卿以下金帛各有差男子爲父後及三老孝悌力田爵人二級流民欲占者人一級遣騎都尉任仁討先零羌不利遂破沒臨洮高句驪遣使貢獻三月京師大饑民相食壬辰公卿詣闕謝詔曰朕以幼沖奉承鴻業不能宣流風化而感逆陰陽至今百姓饑荒更相噉食永懷悼歎若墜淵水咎在朕躬非羣司之責而過自貶引重朝廷之不德其務思變復以助不逮癸巳詔以鴻池假與貧民壬寅司徒魯恭免夏四月丙寅大鴻臚九江夏勤爲司徒三公以國用不足奏令吏民入錢穀得爲關內侯虎賁羽林郎五大夫官府吏緹騎營士各有差已巳詔上林廣城苑可墾闢者賦與貧民甲申清河王虎威薨五月丙申封樂安王寵子延平爲清河王丁酉沛王正薨癸丑京師大風六月烏桓寇代郡上谷涿郡秋七月海賊張伯路等寇略綠海九郡遣侍御史龐雄督州郡兵討破之庚子詔長吏案行在所皆令種粟麥蔬食務盡地力其貧者給種餉九月鴈門烏桓及鮮卑叛敗五原郡兵於高渠谷冬十月南單于叛圍中郎將

耿仲於美稷十一月遣行車騎將軍何熙討之十二月辛酉郡國九地震乙亥有星孛於天紀是歲京師及郡國四十一雨水雹并涼二州大饑人相食

四年春正月元日會徹樂不陳充庭車辛卯詔以三輔比遭寇亂人庶流冗除三年逋租過更口算芻橐稟上郡貧民各有差海賊張伯路復與勃海平原劇賊劉文河周文光等攻馱次殺縣令遣御史中丞王宗督青州刺史法雄計破之度遼將軍梁懂遼東太守耿夔討破南單于於屬國故城丙午詔減百官及州郡縣奉各有差二月丁巳稟九江貧民南匈奴寇常山乙丑初置長

通志

卷六上

後漢紀六上

七

安雍二營都尉官乙亥詔自建初以來諸妖言他過坐徙邊者各歸本郡其沒入官爲奴婢者免爲庶人詔謁者劉珍及五經博士校定東觀五經諸子傳記百家藝術整齊脫誤是正文字三月南單于降先零羌寇襄中漢中太守鄭勤戰歿徙金城郡都襄武戊子杜陵園火癸巳郡國九地震夏四月六州蝗丁丑大赦天下秋七月乙酉三郡大水己卯騎都尉任仁下獄死九月甲申益州郡地震冬十月甲戌新野君陰氏薨使司空持節護喪事大將軍鄧騭罷

五年春正月庚辰朔日有食之丙戌郡國十地震己丑

太尉張禹免甲申光祿勳李修爲太尉二月丁卯詔省
減郡國貢獻太官口食先零羌寇河東遂至河內三月
詔隴西徙襄武安定徙美陽北地徙池陽上郡徙衙夫
餘夷犯塞殺傷吏人閏月丁酉赦涼州河西四郡戊戌
詔令三公特進侯中二千石二千石郡守諸侯相舉賢
良方正有道術達於政化能直言極諫之士各一人及
至孝與衆卓異者并遣詣公車朕將親覽以卹闕政焉
六月甲辰樂成王巡薨秋七月己巳詔三公特進九卿
校尉舉列將子孫明曉戰陣任將帥者九月漢陽人杜
琦王信叛與先零諸種羌攻陷上邽城十二月漢陽太

通志

卷六上

後漢紀六上

庚

守趙博遣客刺殺杜琦是歲九州蝗郡國八雨水
六年春正月庚申詔越巂置長吏高望始昌三苑又令
益州郡置萬茂苑犍爲置漢平苑三月十州蝗夏四月
乙丑司空張敏罷己卯太常劉愷爲司空五月旱丙寅
詔令中二千石下至黃綬一切復秩還贖賜爵各有差
戊辰皇太后幸洛陽寺錄囚徒理冤獄六月壬辰豫章
員谿原山崩辛巳大赦天下遣侍御史唐喜討漢陽賊
王信破斬之冬十一月辛丑護烏桓校尉吳祉下獄死
是歲先零羌滇零死子零昌復襲僞號
七年春正月庚戌皇太后率大臣命婦謁宗廟二月丙

午郡國十八地震夏四月乙未平原王勝薨丙申晦日
有食之五月庚子京師大雩秋護羌校尉侯霸騎都尉
馬賢破先零羌八月丙寅京師大風蝗蟲飛過洛陽詔
賜民爵郡國被蝗傷稼十五以上勿收今年田租不滿
者以實除之九月調零陵桂陽丹陽豫章會稽租米賑
給南陽廣陵下邳彭城山陽廬江九江饑民又調濱水
縣穀輸敖倉

元初元年春正月甲子改元元初賜民爵人二級孝悌
力田人三級爵過公乘得移與子若同產同產子民脫
無名數及流民欲占者人一級鰥寡孤獨篤癯貧不能

通志

卷六上

後漢紀六上

七

自存者粟人三斛貞婦帛人一匹二月己卯日南地坼
三月癸酉日有食之夏四月丁酉大赦天下京師及郡
國五旱蝗詔三公特進列侯中二千石二千石郡守舉
敦厚質直者各一人五月先零羌寇雍城六月丁巳河
東地陷秋七月蜀郡夷寇蠶陵殺縣令九月己丑太尉
李膺罷先零羌寇武都漢中絕隴道辛未大司農山陽
司馬苞爲太尉冬十月戊子朔日有食之先零羌敗涼
州刺史皮陽於狄道乙卯詔除三輔三歲田租更賦口
算十一月是歲郡國十五地震

二年春正月詔稟三輔及并涼六郡流冗貧人蜀郡青

衣道夷奉獻內屬修理西門豹所分漳水爲支渠以溉民田二月戊戌遣中謁者收葬京師客死無家屬及棺椁朽敗者皆爲設祭其有家屬尤貧無以葬者賜錢人五千辛酉詔三輔河內河東上黨趙國太原各修理舊渠通利水道以溉公私田疇三月癸亥京師大風先零羌寇益州遣中郎將尹就討之夏四月丙午立貴人閻氏爲皇后五月京師旱河南及郡國十九蝗甲戌詔切責三司不能消救災眚以時方盛夏且復假貸以觀厥後六月丙戌太尉司馬苞薨洛陽新城地裂秋七月辛

巳太僕太山馬英爲太尉八月遼東鮮卑圍無慮縣九

通志

卷六上

後漢紀六上

七

月又攻夫犁營殺縣令壬午晦日有食之冬十月遣中郎將任尙屯三輔詔郡國中都官繫囚減死一等勿笞詣馮翊扶風屯妻子自隨占著所在女子勿輸亡命死罪以下贖各有差其吏民聚爲盜賊有悔者除其罪乙未右扶風仲光安定太守杜恢京兆虎牙都尉耿溥與先零羌戰於丁奚城光等大敗竝沒左馮翊司馬鈞下獄自殺十一月庚申郡國十地震十二月武陵澧中蠻叛州郡擊破之己酉司徒夏勤罷庚戌司空劉愷爲司徒光祿勳袁敞爲司空

三年春正月甲戌修理太原舊溝渠灌溉官私田東平

陸上言木連理蒼梧鬱林合浦蠻夷反叛二月遣侍御史任連督州郡兵討之郡國十地震三月辛亥日有食之丙辰赦蒼梧鬱林合浦南海吏民爲賊所迫者夏四月京師旱五月武陵蠻叛州郡討破之癸酉度遼將軍鄧遵率南匈奴擊先零羌於靈州破之越嶲徼外夷舉種內屬六月中郎將任尙遣兵擊破先零羌於丁奚城秋七月武陵蠻復叛州郡討平之緱氏地坼九月辛巳趙王宏薨冬十一月蒼梧鬱林合浦蠻夷降丙戌初聽大臣二千石刺史行三年喪癸卯郡國九地震十二月丁巳任尙遣兵擊破先零羌於北地

通志

卷六上

後漢紀六上

七

四年春二月乙巳朔日有食之乙卯大赦天下壬戌武庫災夏四月戊申司空袁敞薨己巳鮮卑寇遼西郡兵與烏桓擊破之五月丁丑太常李郃爲司空六月戊辰三郡雨雹秋七月辛丑陳王鈞薨京師及郡國十雨水詔曰夫霖雨者人怨之所致凡吏有苛虐爲百姓所患苦者有司顯明其罰又月令仲秋養衰老授几杖行糜粥方今案比之時郡縣多不奉行雖有麋粥糠粃相半長吏怠事莫肯躬親甚違詔書養老之意其務崇仁恕賑護寡獨稱朕意焉九月護羌校尉任尙使客刺殺叛羌零昌冬十一月己卯彭城王恭薨十二月越嶲夷寇

遂久殺縣令甲子任尙及騎都尉馬賢與先零羌戰于
富平上河大破之虜人羌率衆降隴右平是歲郡國十
三地震

五年春正月越嵩夷叛二月壬戌中山憲王薨三月京
師及郡國五旱詔稟遭旱貧人夏六月高句驪與濊貊
寇元菟秋七月越嵩蠻夷及旄牛豪叛殺長吏丙子詔
曰舊令制度各有科品今小人不務崇節約嫁娶送終
紛華靡麗至有走卒奴婢被綺縠珠著璣京師尙若斯
何以示四遠設張法禁懇惻分明而有司情任訖不奉
行秋節旣立鷲鳥將用且復重申以觀後效八月丙申

通志

卷六上

後漢紀六上

今

朔日有食之鮮卑寇代郡殺長吏冬十月鮮卑寇上谷
十二月丁巳中郎將任尙有罪棄市是歲郡國十四地
震

六年春二月乙巳京師及郡國四十二地震或坼裂水
泉涌出壬子詔三府選擇屬高第能惠利牧養者各五
人光祿勳與中郎將選孝廉郎寬博有謀清白行高者
五十人出補令長丞尉乙卯詔賜京師尤貧困孤弱單
獨穀人三斛貞婦有節義十斛甄表門閭旌顯厥行三
月庚辰始立六宗祀於洛城西北夏四月會稽大疫遣
光祿大夫將太醫循行疾病賜棺木除田租口賦沛國

勃海大風雨雹五月京師旱六月丁丑樂成王賓薨丙戌平原王得薨秋七月鮮卑寇馬城度遼將軍鄧遵率南單于擊破之九月癸巳陳王竦薨十二月戊午朔日有食之既郡國八地震是歲永昌益州蜀郡夷叛與越舊夷殺長吏燔城邑益州刺史張喬討破降之

永寧元年春正月甲辰任城王安薨三月丁酉濟北王壽薨車師後王叛殺部司馬沈氏羌寇張掖夏四月丙寅立皇子保爲皇太子改元永寧大赦天下賜王主三公列侯下至郎吏從官金帛又賜民爵及布粟各有差己巳詔封陳王羨子崇爲陳王濟北王子萇爲樂成王河閒王子翼爲平原王壬午琅邪王壽薨六月沈氏種羌叛寇張掖護羌校尉馬賢討沈氏羌破之秋七月乙酉朔日有食之冬十月己巳司空李郃免癸酉衛尉廬江陳褒爲司空自三月至是月京師及郡國三十三大風雨水十二月永昌徼外禪國遣使貢獻戊辰司徒劉愷罷遼西鮮卑降癸酉太常楊震爲司空是茂郡國二十三地震夫餘王遣子詣闕貢獻燒當羌叛

建光元年春正月幽州刺史馮煥率二郡太守討高句驪滅貊不剋二月癸亥大赦天下賜諸園貴人王主公卿以下錢布各有差以公卿校尉尚書子弟一人爲郎

通志

卷六上

後漢紀六上

全

舍人三月癸巳皇太后鄧氏崩丙午葬和熹皇后丁未樂安王寵薨戊申追尊皇考清河孝王曰孝德皇皇妣左氏曰孝德皇后祖妣宋貴人曰敬隱皇后夏四月滅貊復與鮮卑寇遼東遼東太守蔡諷追擊戰歿丙辰以廣川并清河國丁巳尊孝德皇元妃耿氏爲甘陵大貴人甲子樂成王萇有罪廢爲臨湖侯己巳令公卿特進侯中二千石二千石郡國守相舉有道之士各一人賜鰥寡孤獨貧不能自存者穀人三斛甲戌遼東屬國都尉龐奮承僞璽書殺元菟太守姚光五月特進鄧騭及度遼將軍鄧遵竝以譖自殺丙申貶平原王翼爲都鄉侯秋七月己卯改元建光大赦天下壬寅太尉馬英薨八月護羌校尉馬賢討燒當羌於金城不利甲子前司徒劉愷爲太尉鮮卑寇居庸關九月雲中太守成嚴擊之戰歿鮮卑圍烏桓校尉於馬城度遼將軍耿夔救之戊子幸衛尉馮石府是秋京師及郡國二十九雨水冬十一月己丑郡國三十五地震或坼裂詔三公已下各上封事陳得失遺光祿大夫案行賜死者錢人二千除今年田租其被災甚者勿收口賦鮮卑寇元菟庚子復斷大臣二千石以上服三年喪癸卯詔三公特進侯卿校尉舉武猛堪將帥者各五人丙午詔京師及郡國被

水雨傷稼者隨頃畝減田租甲子初置漁陽營兵冬十二月高句驪馬韓滅貊圍元菟城夫餘王遣子與州郡并力討破之

延光元年春二月夫餘王遣子將兵救元菟擊高句驪馬韓滅貊破之遂遣使貢獻三月丙午改元延光大赦天下還徙者復戶邑屬籍賜民爵及三老孝悌力田人二級加賜鰥寡孤獨篤癡貧不能自存者粟人三斛貞婦帛人二匹夏四月癸未京師郡國二十一雨雹癸巳司空陳褒免五月庚戌宗正彭城劉授爲司空已已改樂成國爲安平封河間王開子得爲安平王六月郡國

通志

卷六上

後漢紀六上

全

蝗秋七月癸卯京師及郡國十三地震高句驪降虜人羌叛攻穀羅城度遼將軍耿夔討破之八月戊子陽陵園寢火辛卯九眞言黃龍見無功己亥詔三公中二千石舉刺史二千石令長相視事一歲已上至十歲清白愛利能救身率下防姦理煩有益於人者無拘官薄刺史舉所部郡國太守相舉墨綬隱親悉心勿取浮華九月甲戌郡國二十七地震冬十月鮮卑寇鴈門定襄十一月鮮卑寇太原燒當羌豪降十二月九眞徼外蠻夷貢獻內屬是歲京師及郡國二十七雨水大風殺人詔賜壓溺死者年七歲以上錢二千其壞敗廬舍失亡穀

食粟人三斛又田被淹蕩者一切勿收田租若一家皆被災害而弱小存者郡縣爲收斂之虞人羌反攻穀羅城度遼將軍耿夔討破之

二年春正月旄牛夷叛寇靈關殺縣令益州刺史蜀郡西部都尉討之詔選三署郎及吏民能通古文尙書毛詩穀梁春秋各一人丙辰河東潁川大風夏六月壬午郡國十一大風九真言嘉禾生丙申北海王普薨秋七月丹陽山崩八月庚午初令三署郎通達經術任牧民者視事三歲以上皆得察舉九月郡國五雨水冬十月辛未太尉劉愷罷甲戌司徒楊震爲太尉光祿勳東萊

通志

卷六上

後漢紀六上

六

劉熹爲司徒十一月甲辰校獵於上林苑鮮卑敗南匈奴於曼柏是歲分蜀郡西部爲屬國都尉京師及郡國三地震

三年春二月丙子東巡狩丁丑告陳畱太守祠南頓君光武皇帝于濟陽復濟陽今年田租芻橐庚寅遣使者祠唐堯於成陽戊子濟南上言鳳凰集臺縣丞霍收舍樹上賜臺長帛五十匹丞三十匹尉半之吏卒人三匹鳳凰所過亭郡無出今年田租賜男子爵人二級辛卯幸太山柴告岱宗齊王無忌北海王普樂安王延來朝壬辰宗祀五帝于汶上明堂癸巳告祀二祖六宗勞賜

郡縣作樂三月甲午陳王崇薨戊戌祀孔子及七十二
弟子於闕里自魯相令丞尉及孔氏親屬婦女諸生悉
會賜褻成侯以下帛各有差還幸東平至東郡歷魏郡
河內壬戌車駕還京師幸太學是日太尉楊震免夏四
月乙丑車駕入宮假于祖禰壬戌沛國言甘露降豐縣
戊辰光祿勳馮石爲太尉五月南匈奴左日逐王叛使
匈奴中郎將馬翼討破之日南徼外蠻夷內屬六月鮮
卑寇元菟庚午閩中山崩辛未扶風言白鹿見雍辛巳
遣侍御史分行青冀二州災害督錄盜賊秋七月丁酉

初復右校令左校丞官日南蠻外蠻豪帥詣闕貢獻馮

通志

卷六上

後漢紀六上

金

翊言甘露降頰陽衙潁川上言木連理白鹿麒麟見陽
翟鮮卑寇高柳梁王堅薨八月辛巳大鴻臚耿寶爲大
將軍戊子潁川上言麒麟一白虎二見陽翟九月丁酉
廢皇太子保爲濟陰王乙巳詔郡國中都官死罪繫囚
減罪一等詔敦煌隴西及度遼營其右趾以下及亡命
者贖各有差辛亥濟南上言黃龍見歷城庚申晦日有
食之冬十月行幸長安壬午新豐上言鳳凰集西界亭
丁亥會三輔守令掾史於長安作樂閏月乙未祠高廟
遂有事十一陵歷觀上林昆明池遣使者祠太上皇于
萬年以中牢祠蕭何曹參霍光十一月乙丑至自長安

十二月乙未琅邪言黃龍見諸縣是茂京師及諸郡國
二十三日地震三十六雨水疾風雨雹

四年春正月壬午東郡言黃龍二麒麟一見濮陽二月
乙亥下邳王衍薨甲辰南巡狩三月戊午朔日有食之
庚申幸宛帝不豫辛酉令大將軍耿寶行太尉事祠章
陵園廟告長沙零陵太守祠定王節侯鬱林府君乙丑
自宛還丁卯幸葉帝崩于乘輿年三十二祕不敢宣所
在上食間起居如故庚午還宮辛未夕乃發喪尊皇后
曰太后太后臨朝以后兄大鴻臚閻顯爲車騎將軍定
策禁中立章帝孫濟北惠王壽子北鄉侯懿甲戌濟南
通志 卷六上 後漢紀六上 六

王香薨乙酉北鄉侯卽皇帝位夏四月丁酉太尉馮石
爲太傅司徒劉熹爲太尉參錄尚書事前司空李郃爲
司徒辛卯大將軍耿寶中常侍樊豐侍中謝暉周廣乳
母野王君王聖坐相阿黨豐暉廣下獄死寶自殺聖徙
鴈門己酉葬孝安皇帝于恭陵廟曰恭宗六月乙巳大
赦天下詔先帝巡狩所幸皆半入今年田租秋七月西
域長史班勇擊車師後王斬之丙午東海王肅薨冬十
月丙午越巂山崩辛亥少帝薨是冬京師大疫范氏論
曰孝安雖稱尊享御而權歸鄧氏至乃損徹膳服克念
政道然令自房帷威不逮遠始失根統歸成陵敞遂復

計金授官移民逃寇推咎台衡以答天眚既云哲婦亦
惟家之索矣

安帝永初七年元初六年永寧元年建光元年延
光四年卽位十九年

通志

卷六上

後漢紀六上

七

通志卷第六上



